





水經注釋

卷十八之二十





水經注釋卷十八

仁和趙一清誠夫錄

渭水中

又東過武功縣北

渭水於縣斜水自南來注之水出縣西南衙領山北歷斜谷逕五丈原東諸葛亮與步騭書曰僕前軍在五丈原原在武功西十里餘水出武功縣故亦謂之武功水也是以諸葛亮表云臣遣虎步監孟琰據武功水東司馬懿因水長攻琰營臣作竹橋越水射之橋成馳去其水北流注于渭地理志曰斜水出衙領北至郿注渭渭



水又東逕馬冢北諸葛亮與步騭書曰馬冢在武功東十餘里有高勢攻之不便是以畱耳渭水又逕武功縣故城北王莽之新光也地理志曰縣有太壹山古文以為終南杜預以為中南也亦曰太白山在武功縣南去長安二百里不知其高幾何俗云武功太白去天三百山下軍行不得鼓角鼓角則疾風雨至杜彥達曰太白山南連武功山於諸山最為秀傑冬夏積雪望之皓然山上有谷春祠春櫟陽人成帝時病死而尸不寒後忽出櫟南門及光門上而入太白山民為立祠于山嶺春秋來祠中止宿焉山下有太白祠民所祀也劉曜之世

蓋軍用吳寧寫鈔本校

改

官

覽

覽

是山崩長安人劉終於崩所得白玉方一尺有文字曰皇亡皇亡敗趙昌井水竭構五梁罟酉小衰困囂喪嗚呼嗚呼赤牛奮鞞其盡乎時羣臣畢賀中書監劉均進曰此國滅之象其可賀乎終如其言矣渭水又東溫泉水注之溫泉出太壹山其水沸涌如湯杜彥達曰可治百病世清則疾愈世亂則無驗其水下合溪流北注十三里入渭渭水又東逕釐縣故城南舊郃城也后稷之封邑矣即詩所謂有郃家室也城東北有姜嫄祠城西南百步有稷祠郃之釐亭也王少林之為郃縣也路經此亭亭長日亭凶殺人少林曰仁勝凶邪何鬼敢忤遂



宿中夜聞女子稱冤之聲少林曰可前來理女子曰無衣不敢進少林投衣與之女子前訴曰妾夫為涪令之官過宿此亭為亭長所殺少林曰當為理寢冤勿復害良善也因解衣于地忽然不見明告亭長遂服其事亭遂清安渭水又東逕雍縣一清按下雍山一清按雍山有脫文出雍山漢志右扶風武功縣有淮水祠疑雍水祠之誤寰宇記鳳翔府天興縣下云雍水在縣北二里源出西北平地而李應祥雍勝略云雍山在鳳翔縣西北三十里雍水出應劭曰四面積高曰雍以其積高亦可謂之山也關中地勢多積高如風涼原白鹿原斯類非一又康海武功縣志云雍原即周原周原在岐山下則雍山殆即岐山

東南流歷中罕溪世謂之中罕水亦曰冰井之水支阜乎

水南流逕胡城東俗名也蓋秦惠公之故居所謂祈年

宮也孝公又謂之橐泉宮按地理志曰在雍崔駰曰穆公冢在橐泉宮祈年觀下劉向曰穆公葬無邱壠處也史記曰穆公之卒從死者百七十七人良臣子車氏奄息仲行鍼虎秦人哀之為之賦黃鳥余謂崔駰及皇覽繆志也惠公孝公竝是穆公之後繼世之君矣子孫無由起宮於祖宗之墳陵矣以是推之知二證之非實也

雍錄曰據酈此言則是惠公所都雍縣有祈年宮至孝公命為橐泉名雖兩出其實一宮也又引崔駰之言從而辨正其失則是祈年橐泉皆在惠公雍都而亦不知何人所建獨漢書曰惠公所起也黃圖祈為斬且曰穆公造廟記曰宮在城外而始皇本紀則曰在雍皆以世遠難究其的也一清按史記秦本紀云穆公卒葬雍裴駰集解引皇覽曰秦穆公冢在橐泉宮祈年觀下皇覽魏志以為文帝命劉劭集魏略以為皇象受詔撰崔駰



是漢章帝時人今文止有崔駰之說無皇覽之辭而云知二證之非實蓋有缺失又漢志注橐泉宮孝公起祈年公惠公起是有二宮程而左會左陽水世名之西水泰之不知引此所未喻矣

北出左陽谿南流逕岐州城西魏置岐州刺史治左陽

水又南流注于雍水雍水又與東水合俗名也北出河

桃谷南流右會南源世謂之返眼泉亂流南逕岐州城

東而南合雍水州居二水之中南則兩川之交會也世

亦名之為涑空水東流鄧公泉注之水出鄧艾祠北故

名曰鄧公泉數源俱發於雍縣故城南縣故秦德公所

居也晉書地道記以為西號地也漢書地理志以為西

號縣一清按漢志宏農郡陝縣下云西號在雍州而無西號縣之目右扶風號縣有號宮秦宣太后起即

所謂西太康記曰號叔之國矣有號宮平王東遷叔自

此之上陽為南號矣何氏曰按杜預云陝縣東南有號

之下陽城蓋其別都河東宏農地界相接非兩國也榮

陽新鄭之號為號叔所封在陝縣之南故當年號仲之

北號亦得西號之名若右扶風之號與周室二號無與

然則善長誤矣方輿紀要云桃號城在寶雞縣東五十

里古號君之支屬也史記秦昭公十年滅小號即

此地今有桃號二城相距十餘里俗亦謂桃號川

五時祠以上祠祀五帝一清按此注有訛誤地理志云

百三所郊祀志云秦襄公攻戎救周列為諸侯而居西

自以為主少昊之神作西時祀白帝文公東獵汧渭之



垂宮在隴西則西時非雍可知文公酈時在酈縣獻公  
 畦時在櫟陽是又不在雍也雍之五時封禪書云惟雍  
 四時上帝為尊索隱曰雍有五時而言四者顧氏以為  
 兼下文上帝為五非也西時酈時皆非雍密時竝上時  
 下時畦時是為四并高祖增黑帝而五也小司馬以畦  
 時當雍四時之一而寰宇記鳳翔府天興縣有三時原  
 引封禪書酈時密時吳陽上時而云三時在此原亦謂  
 之周原則反遺卻雍之下時矣章懷後漢書馮衍傳註  
 亦但引史記曰秦并天下祠雍四時漢加黑帝謂之五  
 時而不列指四時之目其義終莫能明顧祖禹以為五  
 時者酈密吳陽上下北亦非也又按三時昔秦文公田  
 秦時也五時漢時也此三五之名所由分  
 于汧渭之間夢黃蛇自天屬地其口止于酈衍以為上  
 帝之神於是作酈時祠白帝秦宣公作密時於陳倉北  
 坂祀青帝焉靈公又於吳陽作上時祀炎帝焉獻公作  
 畦時祀赤帝焉

一清按此文與封禪書郊祀志全相乖  
 迥秦宣公作密時于雍不于陳倉北坂

在陳倉北坂者是陳寶祠乃文公作今以陳寶為酈時  
 非矣靈公作吳陽上時祭黃帝作下時祭炎帝索隱曰  
 吳陽地名蓋在岳之南上云雍有故吳陽武時蓋因武  
 時又作上下時以祭黃帝炎帝今云上時祀炎帝誤也  
 史記櫟陽雨金獻公自以為得金瑞作畦時櫟陽而祀  
 白帝漢書云祀上帝字之訛也今云祀赤帝赤即炎也  
 更為漢高帝問曰天有五帝今何四也博士莫知其故  
 謬矣  
 帝曰我知之矣待我而五遂立北時祀黑帝焉應劭曰  
 四面積高曰雍闕駟曰宜為神明之隩故立羣祀焉又  
 有鳳臺鳳女祠秦穆公時有簫史者善吹簫能致白鶴  
 孔雀穆公女弄玉好之公為作鳳臺以居之積數十年  
 一旦隨鳳去云雍宮世有簫管之聲焉今臺傾祠毀不  
 復然矣鄧泉東流注于雍自下雖會他津猶得通稱故



禹貢有雍沮會同之文矣

全氏曰善長誤矣豈可以充州之雍沮釋岐西之水道乎

雍水又東逕邵亭南世謂之樹亭川蓋邵樹聲相近誤

耳亭故邵公之采邑也京相璠曰亭在周城南五十里

後漢郡國志曰郿縣有邵亭謂此也

一清按詩周南召南譜云周召者禹

貢雍州岐山之陽地名今屬右扶風美陽縣史記燕召公世家註譙周云周之支族食采于召謂之召公索隱

曰召者畿內采地夷始食邑于召故曰召公或說者以為文王受命取岐周故墟召地封爵二公故詩有周南

召南言皆在岐山之陽故言南也魏書地形志武功郡美陽縣有邵亭方輿紀要鳳翔府鳳翔縣有召城亦曰

召亭是也而郡國志曰郿有邵亭即上鞏縣鞏亭也班志云右扶風鞏縣周后稷所封師古曰讀與邵同音胎

善長誤記邵作邵以君奭之食采證皇祖之始封舛繆甚矣王伯厚詩地理攷引注云雍水東逕邵亭南黃本

亦是邵字朱氏箋皆改作邵字殆又從而為之辭者耶

雍水又東南流與杜水合

水出杜陽山其水南流謂之杜陽川東南流左會漆水

水出杜陽縣之漆谿謂之漆渠故徐廣曰漆水出杜陽

之岐山者是也漆渠水南流大巒水注之水出西北大

道川東南流入漆即故岐水也淮南子曰岐水出石橋

山東南流相如封禪書曰收龜于岐

朱氏謀瑋箋曰漢書作放龜文穎注

曰周放畜餘龜于池沼之中至漢得之于岐山之傍漢書音義曰岐水名也謂斯

水矣二川并逝俱為一水南與杜水合俗謂之小橫水

亦或名之米流川逕岐山西又屈逕周城南城在岐山

之陽而近西所謂居岐之陽也非直因山致名亦指水

取稱矣又歷周原下北則中水鄉成周聚故曰有周也



一清按漢志右扶風美陽縣禹貢岐山在西北中水鄉周太王所邑水北即岐山矣昔秦

盜食穆公馬處也岐水又東逕姜氏城南為姜水按世

本炎帝姜姓帝王世紀曰炎帝神農氏姜母安登一清按三

皇紀作遊華陽感神而生炎帝長于姜水合而東逕美

陽縣之中亭川水也水發杜陽縣大嶺側世謂之赤泥

峴浴波歷澗俗名大橫水也疑即杜水矣其水東南流

東逕杜陽縣故城東西三百步南北二百步世謂之故

縣川又故號縣有杜陽山山北有杜陽谷有地穴北入

亦不知所極在天柱山南寰宇記鳳翔府岐山縣下云

象曰岐山在崑崙山東南為地乳上多白金周之興也鸞鷲鳴于山上時人亦謂此山為鳳凰堆注水經云天

柱山有鳳凰祠或云其峯高峻迥出諸山狀若柱因以為名一清按御覽及程克齋春秋分記並引之今缺失矣故縣取名焉亦指是水而攝目矣即王莽之通杜也

故地理志曰縣有杜水一清按漢志右扶風杜陽縣杜

縣之詩曰人之初生自土沮漆齊詩作又東二坑水注

之水有二源一水出西北與瀆離水合而東歷五將山

又合鄉谷水水出鄉谿東南流入杜謂之鄉谷川又南

茨水注之一清按名勝志引注作莫水方輿紀要云莫

云莫谷水逕美陽縣與中亭水出好時縣梁山大嶺東

南逕梁山宮西故地理志曰好時有梁山宮秦始皇起

水東有好時縣故城王莽之好邑也世祖建武二年封



建威大將軍耿弇為侯國又南逕美陽縣之中亭川注  
雍水謂之中亭水又南逕美陽縣西永元二年更封鄣

雍侯耿秉為侯國

一清按後漢書耿秉傳秉以章和二

道縣注云渭水東北流與彭川合東北至彭縣南永元  
元年和帝封耿秉為侯國是秉先嘗封彭侯後更封美  
陽足補范書之  
缺此雍字誤其水又南流注于渭渭水又東逕郿塢

南漢獻帝傳曰董卓發卒築郿塢高與長安城等積穀

為三十年儲自云事成雄據天下不成守此足以畢老

其愚如此渭水又東洛谷之水出其南山洛谷北流逕

長城西魏甘露三年蜀遣姜維出洛谷圍長城即斯地

也

又東芒水從南來流注之

芒水出南山芒谷北流逕玉女房水側山際有石室世

謂之玉女房芒水又北逕盩屋縣之竹圃中分為二水

漢沖帝詔曰翟義作亂於東霍鴻負倚盩屋芒竹即此

也日知錄幼主謂之沖帝水  
經注以孺子嬰為沖帝其水分為二流一水之東

北為枝流一水北流注于渭也



水經注釋卷十八終

水經注釋卷十九

仁和趙一清誠夫錄

渭水下

補豐水

補涇水

補芮水

渭水又東過槐里縣南又東澇水從南來注之

渭水逕縣之故城南漢書集註李奇謂之小槐里之西

城也又東與芒水枝流合水受芒水於竹圃東北流又

屈而西北入於渭渭水又東北逕黃山宮南即地理志

所謂縣有黃山宮惠帝二年起者也東方朔傳曰武帝

微行西至黃山宮故世謂之遊城非也就水注之水出

南山就谷北逕大陵西世謂之老子陵昔李耳為周柱



下史以世衰入戎於此有豕事非經證然莊周著書云  
 老聃死秦失弔之三號而出是非不死之言人稟五行  
 之精氣陰陽有終變亦無不化之理以是推之或復如  
 傳古人許以傳疑故兩存耳就水歷竹圃北與黑水合  
 水上承三泉就水之右三泉奇發言歸一瀆北流左逕  
 就水就水又北流注於渭渭水又東合田谿水水出南  
 山田谷北流逕長楊宮西又北逕蓋屋縣故城西又東  
 北與一水合水上承蓋屋縣南源北逕其縣東又北逕  
 思鄉城西又北注田谿田谿水又北流注於渭水也縣  
 北有蒙龍渠上承渭水於郿縣東逕武功縣為成林渠

東逕縣北亦曰靈軹渠漳渠以引堵水徐廣曰一作諸

川是也

一清按漢書地理志云靈軹渠武帝  
穿溝洫志注如淳曰韋水出韋谷

渭水又東

逕槐里縣故城南縣古犬邱邑也周赧王都之

朱氏箋曰帝王

世紀及世本並云懿王自鎬徙  
都犬邱此作赧王字之誤耳

秦以為廢邱亦曰舒邱

和平元年桓帝

沈氏曰是  
靈帝中平

封左中郎將皇甫嵩為侯國

縣南對渭水北背通渠史記秦本紀云秦武王三年渭

水赤三日秦昭王三十四年渭水又大赤三日

沈氏曰  
秦本紀

中無此文而漢書五行志引之再考之則  
武王事見重敘秦世系中而昭王事終佚

洪範五行傳

曰赤者火色也水盡赤以火沴水也渭水秦大川也陰

陽亂秦用嚴刑敗亂之象後項羽入秦封司馬欣為塞



王都櫟陽董翳為翟王都高奴章邯為雍王都廢邱居  
 槐里為三秦漢祖北定三秦引水灌城遂滅章邯三年  
 改曰槐里王莽更名槐治也世謂之為大槐里晉太康  
 中始平郡治也其城遞帶防陸舊渠尚存即漢書所謂  
 槐里環隄者也東有涌水出南山赤谷東北流逕長楊  
 宮東宮有長楊樹因以為名涌水又北逕葦圃西亦謂  
 之仙澤又北逕望仙宮又東北耿谷水注之水發南山  
 耿谷北流與柳泉合東北逕五柞宮西長楊五柞二宮  
 相去八里並以樹名宮亦由陶氏以五柳立稱故張晏  
 曰宮有五柞樹在整屋縣西其水北逕仙澤東北又逕

望仙宮東又北與赤水會又北逕思鄉城東又北注渭  
 水渭水又東合甘水水出南山甘谷北逕秦文王萇陽  
 宮西又北逕五柞宮東又北逕甘亭西在甘水之東鄠  
 縣昔夏啟伐有扈作誓于是亭故馬融曰甘有扈南郊

地名也 寰宇記鄠縣下引水經注曰扈水上承扈陽池  
 一清按此處引有扈以證甘水故知脫文於此

也 甘水又東得澇水口水出南山澇谷北逕漢宜春觀  
 又東北逕鄠縣故城西澇水際城北出合漢陂水水出  
 宜春觀北東北流注澇水北流入於渭

渭漢志無 一清按說文澇  
 澇水也 即上林故地也東方朔稱武帝建元中微行

北至池陽西至黃山南獵長楊東遊宜春夜漏十刻乃



出與侍中常侍武騎待詔及隴西北地良家子能騎射者期諸殿下故有期門之號旦明入山下馳射鹿豕狐兔手格熊羆上大驩樂之上乃使太中大夫虞邱壽王與待詔能用竿者舉籍阿城以南盤屋以東宜春以西提封頃畝及其賈直屬之南山以為上林苑東方朔諫秦起阿房而天下亂因陳泰階六符之事上乃拜太中大夫給事中賜黃金百斤卒起上林苑故相如請為天子遊獵之賦稱烏有先生亡是公而奏上林也

又東豐水從南來注之

地說云渭水又東與豐水會於短陰山內水所匯處無

他高山異巒所有唯原阜石激而已水上舊有便門橋

與便門對直武帝建元三年造張昌曰橋在長安西北

茂陵東如淳曰去長安四十里

杭氏世駿曰漢書註張昌作服虔如淳作蘇林

渭水又逕太公廟北廟前有太公碑文字褫缺今無可

尋渭水又東北與鎬水合水上承鎬池於昆明池北周

武王之所都也故詩云考卜維王宅是鎬京維龜正之

武王成之自漢武帝穿昆明池於是地基構淪褫今無

可究

雍錄曰諸家皆言自漢武帝穿昆明池後鎬京故基皆淪入於池無復可究獨梁載言十道志曰鎬

池一名元阯在昆明池北始皇毀之寰宇記云鎬泉在華陰縣東十九里其水或涌或止深不可測括地圖云

是河眼亦謂之鎬池春秋後傳曰使者鄭容入柏谷關至平舒置



見華山有素車白馬問鄭容安之答曰之咸陽車上人  
 曰吾華山君使願託書致鄙池君子之咸陽過鄙池見  
 大梓下有文石取以款扣梓當有應者以書與之勿妄  
 發致之得所欲鄭容行至鎬池見一梓下果有文石取  
 以款梓應曰諾鄭容如睡覺而見宮闕若王者之居焉  
 謁者出受書入又見頃聞語聲言祖龍死神道茫昧理  
 難辨測故無以精其幽致矣鎬水又北流西北注與滂  
 池合水出鄙池西而北流入於鎬毛詩云滂流浪也而  
 世傳以為水名矣鄭元曰豐鎬之間水北流也鄙水北  
 逕谿靈臺西

一清按谿靈臺谿字誤也朱氏謀埤篋云宋本作漢靈臺竊謂似是而實非也御覽

及長安志引此文作清冷臺與今本異朱氏家多古書  
 未必無據魏書地形志京兆郡長安縣有周靈臺方輿  
 紀要長安縣靈臺下引三輔故事曰周靈臺在鄠縣豐  
 水東鄠縣豐城下云左傳昭四年楚椒舉曰康有豐宮  
 之朝杜預曰豐宮有靈臺康王於是朝諸侯孔穎達曰  
 鄠去長安鎬池二十五里又曰靈臺在縣東北周靈臺  
 也志云豐宮又東二十五里即靈囿之地中有靈臺詩  
 所謂經始靈臺者也春秋僖十五年秦晉戰于韓獲晉  
 侯以歸舍諸靈臺是也又曰三輔故事曰漢靈臺在長  
 安故城西北八里本秦之清臺漢曰靈臺郭緣生述征  
 記長安宮中有靈臺高十五仞水經注漢靈臺在秦阿  
 房宮南去明堂三百步鎬水逕其西漢平帝元始四年  
 立觀此則豐宮之靈臺為周而長安之靈臺為漢酈注  
 既于長安城下紀漢靈臺矣于此又云漢靈臺不幾復  
 與寰宇記引水經注作清靈臺是也蓋清臺之名不始  
 于秦康志賀述禮統云夏為清臺商為神臺周為靈臺  
 毛公詩傳曰神之清明稱靈四方而高曰臺且亦有清  
 靈合稱者史記封禪書公孫卿曰黃帝就青靈臺十二  
 日燒也黃圖曰漢靈臺在長安西北八里又周文王靈  
 臺在長安西北四十里高二十丈周四百二十步明有



周漢之分呂圖亦云漢舊城外有靈臺北與未央宮對此即漢靈臺與鄠宮之靈臺無涉也中尉知改谿字之誤而不知漢字之亦屬臆說與事義大相乖繆者也玉海引水經注曰鄠水北逕靈臺西文王又引水為辟靡靈沼此等文句今皆脫失無惑乎後人之但憑私見也

又逕磁石門西門在阿房前悉以磁石為之故專其目令四夷朝者有隱甲懷刃入門而脅之以示神故亦曰却胡門也鄠水又北注於渭渭水北有杜郵亭去咸陽十七里今名孝里亭中有白起祠嗟乎有制勝之功慙尹商之仁是地即其伏劍處也渭水又東北逕渭城南文穎以為故咸陽矣秦孝公之所居離宮也獻公都櫟陽天雨金周太史儋見獻公曰周故與秦國合而別別五百歲復合合七十歲而

霸王出至孝公作咸陽築冀闕而徙都之故西京賦曰秦里其霸實為咸陽太史公曰長安故咸陽也漢高帝更名新城武帝元鼎三年別為渭城在長安西北渭水之陽王莽之京城也始隸扶風後并長安而沈水注之清一按沈字是沈字之誤地理志右扶風鄠縣下云灃水北過上林苑入渭師古曰灃即今沈水或作沈與沈相似因名沈水灃水今則改名人不識也然則沈字之訛所由來舊矣

其水上承皇子陂於樊川其地即杜之樊鄉也漢祖至櫟陽以將軍樊噲灌廢邱最賜邑于此鄉也其水西北流注杜縣之杜京西西北流逕杜伯冢南杜伯與其友左儒仕宣王儒無罪見害杜伯死之終能報恨于宣王故成公子安五言詩



日誰謂鬼無知杜伯射宣王沈水又西北逕下杜城卽杜伯國也沈水又西北支合故渠渠有二流上承交水合於高陽原而北逕河池陂東而北注沈水沈水又北與昆明故池會又北逕秦通六基東又北逕塢水陂東又北得陂承其陂東北流入於沈水沈水又北逕長安城西與昆明池水合水上承池於昆明臺故王仲都所居也桓譚新論稱元帝被病廣求方士漢中送道士王仲都詔問所能對曰能忍寒暑乃於盛寒日載以駟馬車於昆明池上環冰而馳御者厚衣狐裘寒戰而仲都獨無變色臥于池臺上矐然自若夏大暑日使暴坐環

以十爐火不言熱又身不汗池水北逕鎬京東秦阿房宮西史記曰秦始皇三十五年以咸陽之人多先王之宮小乃作朝宮于渭南亦曰阿城也始皇先作前殿阿房上可坐萬人下可建五丈旗周馳爲閣道自殿直抵城南山表山巔爲闕爲複道自阿房度渭屬之咸陽象天極閣道絕漢抵營室也關中記曰阿房殿在長安西南二十里殿東西千步南北三百步庭中受十萬人其水又屈而逕其北東北流注塢水陂陂水北出逕漢武帝建章宮東於鳳闕南東注沈水又北逕鳳闕東三輔黃圖曰建章宮漢武帝造周二十餘里千門萬戶其東



鳳闕高七丈五尺俗言貞女樓非也漢武帝故事云闕高二十丈關中記曰建章宮圓闕臨北道有金鳳在闕上高丈餘故號鳳闕也故繁欽建章鳳闕賦曰秦漢規模廓然毀泯唯建章鳳闕巋然獨存雖非象魏之制亦一代之巨觀也沈水又北分爲二水一水東北流一水北逕神明臺東傅子宮室曰上于建章中作神明臺井榦樓咸高五十餘丈皆作懸閣輦道相屬焉三輔黃圖曰神明臺在建章宮中上有九室今人謂之九子臺而卽實非也沈水又逕漸臺東漢武帝故事曰建章宮北有太液池池中有漸臺高三十丈漸浸也爲池水所漸一

說星名也南有璧門三層高三十餘丈中殿十二間階陛咸以玉爲之鑄銅鳳五丈飾以黃金樓屋上椽首薄以玉璧因曰璧玉門也沈水又北流注渭亦謂是水爲瀦水也故呂忱曰瀦水出杜陵縣漢書音義曰瀦水聲而非水也亦曰高都水前漢之末五侯王氏大治池沼引沈水入長安城故百姓歌之曰五侯初起曲陽最怒壤決高都竟連五杜土山漸臺象西白虎卽是水也又東過長安縣北

渭水東分爲二水廣雅曰水自渭出爲滎其由河之有雍也此瀦東北流逕魏雍州刺史郭淮碑南又東南合



一水逕兩石人北秦始皇造橋鐵鑿重不勝故刻石作力士孟賁等像以祭之鐵乃可移動也又東逕陽侯祠北漲輒祠之此神能爲大波故配食河伯也後人以爲鄧艾祠悲哉讒勝道消專忠受害矣渭水又東注此水水上梁謂之渭橋秦制也亦曰便門橋秦始皇作離宮於渭水南北以象天宮故三輔黃圖曰渭水貫都以象天漢橫橋南度以法牽牛南有長樂宮北有成陽宮欲通二宮之間故造此橋廣六丈南北三百八十步六十八間七百五十柱一百二十二梁橋之南北有隄激立石柱柱南京兆主之柱北馮翊主之有令丞各領徒一

千五百人橋之北首壘石水中故謂之石柱橋也舊有忖畱神像此神嘗與魯班語班令其神出忖畱曰我貌穉醜卿善圖物容我不能出班于是拱手與言曰出頭見我忖畱乃出首班于是以脚畫地忖畱覺之便還沒水故置其像於水唯背以上立水上後董卓入關遂焚此橋魏武帝更修之橋廣三丈六尺忖畱之像曹公乘馬見之驚又命下之燕丹子曰燕太子丹質于秦秦王遇之無禮乃求歸秦王爲機發之橋欲以陷丹丹過之橋不爲發又一說交龍捧輦而機不發但言

朱氏謀瑋箋曰謝云

疑有脫誤今不知其故處矣渭水又東與沈水枝津合水上



承沈水東北流逕鄧艾祠南又東分爲二水一水東入  
逍遙園注瀉池池中有臺觀蓮荷被浦秀實可翫其一

水北流注于渭渭水又東逕長安城北漢惠帝元年築

六年成一清按漢書惠帝紀元年城長安三年春發長  
安六百里內男子十四萬六千人城長安三十

日罷注鄭氏曰城一面故速罷又五年九月長安城成

六年起長安西市也而史記呂后紀云惠帝三年方築

城四年就半五年六年城就索隱曰漢宮闕疏四年築

東面五年築北面漢舊儀城方六十三里經緯各十二

里三輔舊事云即咸陽也秦離宮無城故城之王莽更

城形似北斗也名常安十二門東出北頭第一門本名宣平門王莽更

名春王門正月亭亦曰東城門其郭門亦曰東都門清

一按漢書王莽即逢萌挂冠處也第二門本名清明門一

傳無東字

曰凱門王莽更曰宣德門布恩亭內有藉田倉亦曰藉

田門第三門本名霸城門王莽更名仁壽門無疆亭民

見門色青又名青城門或曰青綺門亦曰青門門外舊

出佳瓜昔廣陵人邵平爲秦東陵侯秦破爲布衣種瓜

此門瓜美故世謂之東陵瓜是以阮籍詠懷詩曰昔聞

東陵瓜近在青門外連畛拒阡陌子母相鉤帶指謂此

門也南出東頭第一門本名覆盎門王莽更名永清門

長茂亭其南有下杜城應劭曰故杜陵之下聚落也故

曰下杜門又曰端門北對長樂宮第二門本名安門亦



央宮第三門本名平門王莽更名信平門誠正亭西出  
 南頭第一門本名章門王莽更名萬秋門億年亭亦曰  
 故光畢門也又曰便門第二門本名直門王莽更名直  
 道門端路亭故龍樓門也張晏曰門樓有銅龍三輔黃  
 圖曰長安西出第二門即此門也第三門本名西城門  
 亦曰雍門王莽更名章義門著誼亭其水北入有函里  
 氏名曰函里門又曰光門亦曰突門一清按此西出之  
第三門也曰光門  
 而北出西頭第一門曰橫門亦曰光門二門不應相同  
 也程大昌曰以黃圖考之長安城北面從西數來第一  
 門名橫門門外有橋曰橫橋呂相長安圖呂大綱亦同又  
 黃圖長安有九市其三在道東東市在突門夾橫橋大  
 道水經曰光門亦名突門在長安西從南來第三門正  
 與黃圖呂圖之謂橫門者隅角相次故黃圖呂圖之謂

在北者即與水經之謂突門光門為在城北出西頭第  
西面者相應也今去古遠不敢以何為定

一門本名橫門王莽更名霸都門左幽亭如淳曰音光  
 故曰光門其外郭有都門有棘門徐廣曰棘門在渭北  
 孟康曰在長安北秦時宮門也如淳曰三輔黃圖曰棘  
 門在橫門外接漢書徐厲軍於此備匈奴又有通門亥  
 門也其第二門本名洛門又曰朝門王莽更名建子門  
 廣世亭一曰高門蘇林曰高門長安城北門也一曰廚  
 門其內有長安廚官在東故名曰廚門也如淳曰今名  
 廣門也第三門本名杜門亦曰利城門王莽更名進和  
 門臨水亭其外有客舍故名曰客舍門又曰洛門也凡



此諸門皆通達九達三途洞開隱以金椎周以林木左出右入爲往來之徑行者升降有上下之別漢成帝之爲太子元帝嘗急召之太子出龍樓門不敢絕馳道西至直城門方乃得度上怪遲問其故以狀對上悅乃著令令太子得絕馳道也渭水東合昆明故渠渠上承昆明池東口東逕河池陂而北亦曰女觀陂又東合沈水亦曰漕渠又東逕長安縣南東逕明堂南舊引水爲辟雍處在鼎路門東南七里其制上圓下方九宮十二堂四嚮五室堂北三百步有靈臺是漢平帝元始四年立渠南有漢故圓丘成帝建始二年罷雍五時始祀皇天

上帝于長安南郊應劭曰天郊在長安南卽此也故渠之北有白亭博望苑漢武帝爲太子立使通賓客從所好也太子巫蠱事發斫杜門東出史良娣死葬于苑北宣帝以爲戾園以倡優千人樂思后園廟故亦曰千鄉故渠又東而北屈逕青門外與沈水枝渠會渠上承沈水于章門西飛渠引水入城東爲倉池池在未央宮西池中有漸臺漢兵起王莽死于此臺又東逕未央宮北高祖在關東令蕭何成未央宮何斬龍首山而營之山長六十餘里頭臨渭水尾達樊川頭高二十丈尾漸下高五六丈土色赤而堅云昔有黑龍從南山出飲渭水



其行道因山成跡山卽基闕不假築高出長安城北有元武闕卽北闕也東有蒼龍闕闕內有閭闔止車諸門未央殿東有宣室玉堂麒麟含章白虎鳳凰朱雀鸞鸞昭陽諸殿天祿石渠麒麟三閣未央宮北卽桂宮也周十餘里內有明光殿走狗臺柏梁臺舊乘複道用相逕通故張衡西京賦曰鉤陳之外閣道穹窿屬長樂與明光逕北通于桂宮故渠出二宮之間謂之明渠也又東歷武庫北舊樛里子葬于此樛里子名疾秦惠王異母弟也滑稽多智秦人號曰智囊葬于昭王廟西渭南陰鄉樛里故俗謂之樛里子云我百歲後是有天子之宮

夾我墓穴以昭王七年卒葬於渭南章臺東至漢長樂宮在其東未央宮在其西武庫直其基秦人嗔曰力則任鄙智則樛里也明渠又東逕漢高祖長樂宮北本秦之長樂宮也周二十里殿前列銅人殿西有長信長秋永壽永昌諸殿殿之東北有池池北有層臺俗謂是池爲酒池非也故渠北有樓豎漢京兆尹司馬文預碑故渠又東出城分爲二渠卽漢書所謂王渠者也蘇林曰王渠官渠也猶今御溝矣晉灼曰渠名也在城東霸門外一水逕楊橋下卽青門橋也側城北逕鄧艾祠西而北注渭今無水其一渠東逕奉明縣廣成鄉之廣明苑



南史皇孫及王夫人葬于郭北宣帝遷苑南卜以為悼園益園民千六百家立奉明縣以奉二園園在東都門昌邑王賀自霸御法駕郎中令龔遂驂乘至廣明東都門是也故渠東北逕漢太尉夏侯嬰冢西葬日柩馬悲鳴輕車罔進下得石槨銘云于嗟滕公居此室故遂葬焉冢在城東八里飲馬橋南四里故時人謂之馬冢

又東過霸陵縣北霸水從縣西北流注之

霸者水上地名也古曰滋水矣秦穆公霸世更名滋水為霸水以顯霸功水出藍田縣藍田谷所謂多玉者也西北有銅谷水次東有鞞谷水二水合而西注之又西

流入湓水

長安志劉谷水一名泥水引水經注曰水出藍田之東谷俗謂之劉谷西北與石門水合

又石門谷水東有銅谷水合輕谷水西注泥水今本無之一清按輕谷水是鞞谷水之訛湓水又西

逕嶢關北歷柳嶢城東西有二城魏置清湓軍于城內

世亦謂之清湓城也秦二世三年漢祖入自武關攻秦

趙高遣將拒於嶢關者也土地記曰藍田縣南有嶢關

地名嶢柳道通荊州晉地道記曰關當上洛縣西北湓

水又西北流入霸

一清按漢志京兆南陵縣沂水出藍田谷北至霸陵入霸水而是注湓水

源流正與班固所稱沂水合沂湓音同觀宋敏求引注佚文可見師古音沂為先歷反蓋誤耳而道元引漢志則以瀆霸水又北歷藍田川逕藍田縣北竹書紀年梁

惠成王三年秦子向命為藍君蓋子向之故邑也川有



漢臨江王榮冢景帝以罪徵之將行祖于江陵北門車  
 軸折老父泣曰吾王不反矣榮至中尉郅都急切責王  
 王年少恐而自殺葬于是川有鶯數萬銜土置冢上百  
 姓矜之霸水又左合澆水歷白鹿原東即霸川之西故  
 芷陽矣史記秦襄王葬芷陽者是也一清按史記秦始  
 皇紀重敘秦世系  
云昭襄享國五十六年葬芷陽索隱曰十九年而立葬  
 芷陵也芷與芷同此是昭襄王之陵而其孫莊襄王亦  
 葬芷陽即所謂之霸上漢文帝葬其上謂之霸陵上有  
 謂子楚陵也  
 四出道以瀉水在長安東南三十里故王仲宣賦詩云  
 南登霸陵岸迴首望長安漢文帝嘗欲從霸陵上西馳  
 下峻坂袁盎攬轡於此處上曰將軍怯也盎曰臣聞千

金之子坐不垂堂百金之子立不倚衡聖人不乘危今  
 馳不測如馬驚車敗奈高廟何上乃止霸水又北長水  
 注之水出杜縣白鹿原其水西北流謂之荆谿荆谿水  
 又西北左合狗柳川水水有二源西川上承礪山之斫  
 槃谷次東有苦谷二水合而東北流逕風涼原西關中  
 圖曰麗山之西川中有阜名曰風涼原在礪山之陰雍州  
 之福地即是原也其水傍谿北注原上有漢武帝祠其  
 水右合東川水出南山之石門谷次東有孟谷次東有  
 大谷次東有雀谷次東有土門谷五水北合而北歷風  
 涼原東又北與西川會原為二水之會亂流北逕宣帝許



后陵東而北去杜陵十里斯川於是有狗枷之名川東亦曰白鹿原也上有狗枷堡三秦記曰麗山西有白鹿

原原上有狗枷堡秦襄公時有天狗來下有賊則狗吠

之故一堡無患故川得厥目焉

一清按北齊書昭帝紀云時有天狗下亦其類

也山海經有獸亦名天狗焉西山經曰陰山有獸焉其狀如狸而白首名曰天狗其音樞樞可以禦凶吳任臣

廣註引事物紺珠云天狗如狸白首音如猫食蛇

川水又北逕杜陵東元帝初

元元年葬宣帝杜陵北去長安五十里陵之西北有杜

縣故城秦武公十一年縣之漢宣帝元康元年以杜東

原上為初陵更名杜縣為杜陵也王莽之饒安也其水

又北注荆谿荆谿水又北入霸水又有溫泉入焉水發

自亭下入荆谿水亂流注于霸俗謂之漑水非也史記

音義文帝出安門注云在霸陵縣有故亭即郡國志所

謂長門亭也史記曰霸漑長水也雖不在祠典以近咸

陽秦漢都涇渭長水盡得比大川之禮

一清按史記封禪書云霸產長

水漑潏涇渭皆非大川以近咸陽盡得比山

昔文帝居川祠今注云云是抄變其詞而失其義也

霸陵北臨厠指新豐路示慎夫人曰此走邯鄲道也因

使慎夫人鼓瑟上自倚瑟而歌悽愴悲懷顧謂羣臣曰

以北山石為榭用紵絮斲陳漆其間豈可動哉釋之曰使

其中有可欲雖錮南山猶有隙使無可欲雖無石郭又

何戚焉文帝曰善拜廷尉韋昭曰高岸夾水為厠今斯



原來二水也霸水又北會兩川又北故渠左出焉霸水  
 又北逕王莽九廟南王莽地皇元年博徵天下工匠壞  
 撤西苑建章諸宮館十餘所取材瓦以起九廟竿及吏  
 民以義入錢穀助成九廟廟殿皆重屋太初祖廟東西  
 南北各四十丈高十七丈餘廟半之為銅薄櫨飾以金  
 銀雕文窮極百工之巧褫高增下功費數百巨萬卒死  
 者萬數霸水又北逕枳道在長安縣東十三里王莽九  
 廟在其南漢世有白鷺羣飛何氏曰亭林云當作白蛾  
建昭元年也自東都門過于枳道呂后祓除于霸上還見倉  
 狗擗脅于斯道也水上有橋謂之霸橋地皇三年霸橋

木災自東起卒數千以水汎沃救不滅晨熾夕盡王莽  
 惡之下書曰甲午火橋乙未立春之日也予以神明聖  
 祖黃虞遺統受命至於地皇四年為十五年正以三年  
 終冬絕滅霸駭之橋欲以興成新室統一長存之道其  
 名霸橋為長存橋霸水又北左納漕渠絕霸右出焉東  
 逕霸城北又東逕子楚陵北皇甫謐曰秦莊王葬于芷  
 陽之麗山京兆東南霸陵山劉向日莊王大其名立墳  
 者也戰國策曰莊王字異人更名子楚故世人猶以子

楚名陵一清按史記始皇之父為莊襄王索隱以為葬  
陽陵寰宇記雍州萬年縣下云霸岸在通化門  
 東二十里秦襄王葬于其坂謂之霸上有城即秦繆公  
 所築漢為縣在東北二十三里霸水東霸陵故城是也



東南至漢文帝陵十里

又東逕新豐縣右會故渠上承霸水東北

逕霸城縣故城南漢文帝之霸陵縣也王莽更之曰水

章魏文帝黃初元年何氏曰文當作明黃當作景事見三國志魏明帝紀注中然後漢書

方術傳注引此正同豈唐初所傳之本已訛謬不徒長可讀耶書不經劉向揚雄之手其孰為是正哉

安金狄重不可致因畱霸城南人有見薊子訓與父老

共摩銅人日正見鑄此時計爾日以近五百年矣故渠

又東北逕劉更始冢西更始二年為赤眉所殺故侍中

劉恭夜往收而埋之光武使司徒鄧禹收葬于霸陵縣

更始尚書僕射行大將軍事鮑永持節安集河東聞更

始死歸世祖累遷司隸校尉行縣逕更始墓遂下拜哭

盡哀而去帝問公卿太中大夫張湛曰仁不遺舊忠不

忘君行之高者帝乃釋之又東北逕新豐縣右合漕渠

漢大司農鄭當時所開也以渭難漕命齊水工徐伯乃

發卒穿渠引渭合渠自昆明池南傍山原東至于河且

田且漕大以為便霸水又北逕秦虎圈東列士傳曰秦

昭王會魏王魏王不行使朱亥奉璧一雙秦王大怒置

朱亥虎圈中亥瞋目視虎背裂血出濺虎虎不敢動即

是處也霸水又北入于渭水渭水又東會成國故渠渠

魏尚書左僕射衛臻征蜀所開也號成國渠引以澆故

田一清按漢志郿縣成國渠北至上林入蒙其瀆上承龍渠蓋西京已有是渠衛公振更修治之



汧水於陳倉東東逕郿及武功槐里縣北渠左有安定梁巖冢碑碣尚存又逕漢武帝茂陵南故槐里之茂鄉也應劭曰武帝自爲陵在長安西北八十餘里漢武帝故事曰帝崩後見形謂陵令薛平日吾雖失勢猶爲汝君奈何令吏卒上吾陵磨刀劍乎自今以後可禁之平頓首謝因不見推問陵傍果有方石可以爲礪吏卒常盜磨刀劍霍光欲斬之張安世曰神道茫昧不宜爲法乃止故阮公詠懷詩曰失勢在須臾帶劍上吾邱陵之西南如北一里卽李夫人冢冢形三成世謂之茭陵夫人兄延年知音尤善歌舞帝愛之每爲新聲變曲聞者

莫不感動嘗侍上起舞歌曰北方有佳人絕世而獨立一顧傾人城再顧傾人國寧不知傾城復傾國佳人難再得上曰世豈有此人乎平陽主曰延年女弟上召見之妖麗善歌舞得幸早卒上憫念之以后禮葬悲思不已賦詩悼傷故渠又北分爲二渠東逕虎圈南而東入霸一水北合渭今無水故渠又東逕茂陵縣故城南武帝建元二年置地理志曰宣帝縣焉王莽之宣成也故渠又東逕龍泉北今人謂之溫泉非也渠北故坂北卽龍淵廟如淳曰二輔黃圖有龍淵宮今長安城西有其廟處蓋宮之遺也故渠又東逕姜原北渠北有漢昭帝平



陵東南去長安七十里又東逕平陵縣故城南地理志  
 曰昭帝置王莽之廣利也故渠之南有竇氏泉北有徘徊  
 廟又東逕漢大將軍魏其侯竇嬰冢南又東逕成帝  
 延陵南陵之東北五里即平帝康陵坂也故渠又東逕  
 渭陵南元帝永光四年以渭城壽陵亭原上為初陵詔  
 不立縣邑又東逕哀帝義陵南又東逕惠帝安陵南陵  
 北有安陵縣故城也地理志曰惠帝置王莽之嘉平也  
 渠側有杜郵亭又東逕渭城北地理志曰縣有蘭池宮  
 秦始皇微行逢盜于蘭池今不知所在也雍錄曰咸陽  
 縣東二十五里蘭池陂即始皇遇盜之地漢于其北立池陽縣一清  
 按漢志左馮翊池陽縣應劭曰在池水之陽劉昭郡國

志補注引三秦記曰始皇引渭水為長池東西  
 二百里南北三十里刻石為鯨魚長二百丈 又東逕

長陵南亦曰長山也三秦記曰長安城北有平原廣數

百里民井汲巢居井深五十丈秦名天子冢曰山漢曰

陵故通曰山陵矣風俗通曰陵者天生自然者也今王

公墳壠稱陵春秋左傳曰南陵夏后臯之墓也春秋說

題辭云邱者墓也冢者種也種墓也羅倚于山分卑尊

之名者也故渠又東逕漢丞相周勃冢南冢北有亞夫

冢故渠東南謂之周氏曲又東南逕漢景帝陵南又東

南注于渭今無水渭水又東逕霸城縣北與高陵分水

水南有定陶恭王廟傅太后陵元帝崩傅昭儀隨王歸



國稱定陶太后後十年恭王薨子代爲王徵爲太子太子卽帝位立恭王寢廟于京師比宣帝父悼皇故事元壽元年傅后崩合葬渭陵潘岳關中記漢帝后同塋則爲合葬不共陵也諸侯皆如之恭王廟在霸城西北廟西北卽傅太后陵不與元帝同塋渭陵非謂元帝陵也蓋在渭水之南故曰渭陵也陵與元帝齊者謂同十二丈也王莽奏毀傅太后冢冢崩壓殺數百人開棺梟聞數里公卿在位皆阿莽旨入錢帛遣子弟及諸生四夷凡十餘萬人操持作具助將作掘傅后冢二旬皆平周棘其處以爲世戒今其處積土猶高世謂之增墀又亦

謂之增阜俗亦謂之成帝初陵處所未詳也渭水又逕平阿侯王譚墓北冢次有碑左則涇水注之渭水又東逕鄠縣西蓋隴西郡之鄠徙也渭水又東得白渠枝口又東與五丈渠合水出雲陽縣石門山謂之清水東南流逕黃嶽山西又南入葭襖縣歷原南出謂之清水口東南流絕鄭渠又東南入高陵縣逕黃白城西本曲梁宮也南絕白渠屈而東流謂之曲梁水又東南逕高陵縣故城北東南絕白渠瀆又東南入萬年縣謂之五丈渠又逕蕩原東東南流注于渭渭水右逕新豐縣故城北東與魚池水會水出麗山東北水本導源東流後秦



始皇葬于山北水過而曲行東注北轉始皇造陵取土其地汙深水積成池謂之魚池池在秦皇陵東北五里周圍四里池水西北流逕始皇冢北秦始皇大興厚葬營建冢壙於麗戎之山一名藍田其陰多金其陽多玉始皇貪其美名因而葬焉斬山鑿石下錮三泉以銅爲槨旁行周迴三十餘里上畫天文星宿之象下以水銀爲四瀆百川五嶽九州具地理之勢宮觀百官奇器珍寶充滿其中令匠作機弩有所穿近輒射之以人魚膏爲燈燭取其不滅者久之後宮無子者皆使殉葬甚衆墳高五丈周迴五里餘作者七十萬人積年方成而周

章百萬之師已至其下乃使章邯領作者以禦難弗能禁項羽入關發之以三十萬人三十日運物不能窮關東盜賊銷槨取銅牧人尋羊燒之火延九十日不能滅北對鴻門十里池水又西北流水之西南有溫泉世以療疾三秦記曰麗山西北有溫水祭則得入不祭則爛人肉俗云始皇與神女遊而忤其旨神女唾之生瘡始皇謝之神女爲出溫水後人因以澆洗創張衡溫泉賦序云余出麗山觀溫泉浴神井嘉洪澤之普施乃爲之賦云此湯也不使灼人形體矣池水又逕鴻門西又逕新豐縣故城東故麗戎地也高祖王關中太上皇思東



歸故象舊里制茲新邑立城社樹枌榆令街庭若一分  
置豐民以實茲邑故名之為新豐也漢靈帝建寧三年

改為都鄉封段熲為侯國一清按漢承秦制十里一亭十亭一鄉都亭都鄉所以統

一縣之鄉亭者後漢書本傳段熲初封都鄉侯更封新豐縣侯非改新豐為都鄉也後立陰槃城

其水際北城世謂是水為陰槃水又北絕漕渠注于渭

渭水又東逕鴻門北舊大道北下坂口名也古有鴻門

亭漢書高祖將見項羽楚漢春秋曰項王在鴻門亞父

曰吾使人望沛公其氣衝天五色相繆或似龍或似雲

非人臣之相可誅之漢高祖會項羽范增目羽羽不應

樊噲杖盾撞人入食豕肩於此羽壯之郡國志曰新豐

縣東有鴻門亭者也郭緣生曰或云霸城南門曰鴻門

也項羽將因會危高祖羽仁而弗斷范增謀而不納項

伯終護高祖以獲免既抵霸上遂封漢王按漢書注鴻

門在新豐東十七里則霸上應百里按史記項伯夜馳

告張良良與俱見高祖仍使夜返考其道里不容得爾

今父老傳在霸城南門數十里於理為得按緣生此記

雖歷覽史漢述行涂經見可謂學而不思矣今新豐縣

故城東三里有坂長二里餘塹原通道南北洞開有同

門狀謂之鴻門孟康言在新豐東十七里蓋指縣治而

言非謂城也自新豐故城西至霸城五十里霸城西十



里則霸水西二十里則長安城應劭曰霸水上地名在長安東二十里即霸城是也高祖舊停軍處東去新豐既遠何由項伯夜與張良共見高祖乎推此言之知緣生此記乖矣渭水又東石川水南注焉渭水又東戲水注之水出麗山馮公谷東北流又北逕麗戎城東春秋晉獻公五年伐之獲麗姬於是邑麗戎男國也姬姓秦之麗邑矣又北右總三川逕鴻門東又北逕戲亭東應劭曰戲宏農湖縣西界也地隔諸縣不得為湖蘇林曰戲邑名在新豐東南三十里孟康曰乃水名也今戲亭是也昔周幽王悅褒姒姒不笑王乃擊鼓舉烽以徵諸

侯至無寇褒姒乃笑王甚悅之及犬戎至王又舉烽以徵諸侯諸侯不至遂敗幽王於戲水之上身死於麗山之北故國語曰幽滅者也漢成帝建始二年造延陵為初陵以為非吉于霸曲亭南更營之鴻嘉元年于新豐戲鄉為昌陵縣以奉初陵永始元年詔以昌陵卑下客土疎惡不可為萬歲居其罷陵作令吏民反故徙將作大匠解延年一清按漢書作解萬年燉煌關中記曰昌陵在霸城東二十里取土東山與粟同價所費巨萬積年無成即此處也戲水又北分為二水並注渭水渭水又東冷水

入焉水南出肺浮山

一清按長安志曰水經曰浮肺山一作肺浮是舊本原作浮肺今本



乃後人據他書更易耳

蓋麗山連麓而異名也北會三川統歸一

壑歷陰槃新豐兩原之間北流注于渭渭水又東首水  
 南出倒虎山西總五水單流注逕秦步高宮東世名市  
 邱城歷新豐原東而北逕步壽宮西又北入渭渭水又  
 東得西陽水又東得東陽水並南出廣鄉原北垂俱北  
 入渭渭水又東逕下邳縣故城南秦伐邳置邳戎於此  
 有上邳故加下也渭水又東與竹水合南出竹山北逕  
 媚加谷歷廣鄉原東俗謂之大赤水北流注于渭渭水  
 又東得白渠口太始二年趙國中大夫白公奏穿渠引  
 涇水首起谷口出於鄭渠南名曰白渠民歌之曰田于

何所池陽谷口鄭國在前白渠起後即水所始也東逕

宜春城南又東南逕池陽城北枝瀆出焉東南逕蕩原

下逕鄠縣故城北東南入渭今無水白渠又東枝渠出

焉東南逕高陵縣故城北地理志曰左輔都尉治王莽

之千春也太康地記謂之曰高陸也車頻秦書曰苻堅

建元十二年高陸縣民穿井得龜大二尺六寸背文負

八卦古字堅以石為池養之十六年而死取其骨以問

吉凶名為客龜太卜佐高夢客龜言我將歸江南不遇

死于秦高於夢中自解曰龜三萬六千歲而終終必亡

國之徵也為謝元破於淮肥自縊新城浮圖中秦祚因



卽淪矣又東逕櫟陽城北史記秦獻公二年城櫟陽自  
雍徙居之十八年雨金于是處也項羽以封司馬欣爲  
塞王按漢書高帝克關中始都之王莽之師亭也後漢  
建武二年封驃騎大將軍景丹爲侯國丹讓世祖曰富  
貴不還故鄉如衣錦夜行故以封卿白渠又東逕秦孝  
公陵北又東南逕居陵城北蓮勺城南又東注金氏陂  
又東南注于渭故漢書溝洫志曰渠首起谷口尾入櫟  
陽是也今無水

又東過鄭縣北

渭水又東逕轡都城北故蕃邑殷契之所居世本曰契

居蕃闕駟曰蕃在鄭西然則今轡城是矣俗名之赤城  
水曰赤水非也苻健入秦據此城以抗杜洪小赤水卽  
山海經之灌水也水出石脆之山北逕蕭加谷於孤柏  
原西東北流與禺水合水出英山北流與招水相得亂  
流西北注于灌灌水又北注于渭渭水又東西石橋水  
南出馬嶺山積石據其東麗山距其西源泉上通懸流  
數十與華岳同體其水北逕鄭城西水上有橋橋雖崩  
褫舊跡猶存東去鄭城十里故世以橋名水也而北流  
注于渭闕駟謂之新鄭水渭水又東逕鄭縣故城北史  
記秦武公十年縣之鄭桓公友之故邑也漢書薛瓚注



言周自穆王已下都於西鄭不得以封桓公也幽王既  
 敗虢檜又滅遷居其地國于鄭父之邱是為鄭桓公無  
 封京兆之文余按史記考春秋國語世本言周宣王二  
 十二年封庶弟友于鄭又春秋國語並言桓公為周司  
 徒以王室將亂謀于史伯而寄帑與賄于虢檜之間幽王  
 實于戲鄭桓公死之平王東遷鄭武公輔王室滅虢檜而  
 兼其土故周桓公言于王曰我周之東遷晉鄭是依乃  
 遷封于彼左傳隱公十一年鄭伯使公孫獲曰吾先君  
 新邑于此其能與許爭乎是其指新鄭為言矣然班固  
 應劭鄭元皇甫謐裴頠王隱闕駟及諸述作者咸以西

鄭為友之始封也賢于薛瓚之單說也無宜違正經而  
 從逸錄矣赤眉樊崇于鄭北設壇祀城陽景王而尊右  
 校卒史劉俠卿牧牛兒盆子為帝年十五被髮徒跣為  
 具絳單衣半頭赤幘直綦履顧見眾人拜恐畏欲號號  
 年建世後月餘乘白蓋小車與崇及尚書一人相隨向  
 鄭北渡渭水即此處也城南山北有五部神廟東南向  
 華岳廟前有碑後漢光和四年鄭縣令河東裴畢字君

先立

一清按五部神廟碑洪氏适隸釋作殺阬君神祠  
 碑其辭曰天地定位山

闕

祭法曰山林川谷有益於民糶二在祀典夫中條之

山者蓋華嶽之體也石隄樹谷南通商維以屬熊耳百  
 川鍾集充崖滿谷時有盛雨彭瀾涌溢乘高趨下揚波  
 跳沫於是殺阬以為之資承寫其流北注諸渭蠲滌滄



暴使不為害前世通利吏民興貴有御史大夫將軍牧  
 伯故為立祠以報其功自亡新已來其祀隳廢阮稍堙  
 塞隄防沮潰漂沒田疇滯敗亭市神怒民怨縣遂以衰  
 賤仕宦失官踏弊不震迄光緒四年作諮之歲令河東  
 聞憲闕君諱闕字君闕為政以德五教時序肅恭明神  
 敬奉禮祀勤卹民隱而除其害愍一縣之陵遲懼闕至  
 之無備追惟伯禹遏治之利乃復浚治殺阮通利其水  
 紹修舊祀宏祐其祠使民報祈視於社稷其有徵拜州  
 郡辟召皆當來辭大小有差殺阮君尚饗後之人是遵  
 是奉神必據焉光緒四年六月辛未造右殺阮君神祠  
 之碑銘篆額在鄭縣靈帝光和四年縣令裴畢字君先  
 立碑無縣令姓名据水經得之殺有二陵古稱地險蓋  
 川阜高深雨盛水集有阮以儲之則可以疏泄漑注而  
 無溢溢之患自魏晉以來謂之五部神廟歐陽公嘗託  
 部使者模此碑命工以麵填其刻而鑄剔之始可讀云  
 廟有石隄西戍樹谷五樓先生東臺御史王翦將軍之  
 像莫可曉今碑云石隄樹谷南通商雜當是有石為隄  
 有木為谷後人因以名其神碑云前世通利吏民興貴  
 有御史大夫將軍牧伯故為立祠考其文意蓋謂前世  
 阮不堙塞水泉通利地產人物有至御史將軍牧伯之

貴者後人不考亦以名其神爾光緒四年龍集辛酉  
 此碑以作噩為作諮者出西漢天文志碑以彭為澎  
 卽阮字拓即拓字金石錄跋尾曰裴君水經以為名畢  
 而集古錄云名暉今詳其點畫頗近畢字疑集古錄誤  
 又歐陽棐集古錄目及宋不知作者天下碑錄俱  
 作裴暉字君光光字亦誤當以酈注先字為正 渭水

又與東石橋水會故沈水也水南出馬嶺山北流逕武

平城東按地理志左馮翊有武成縣王莽之桓城也石

橋水又逕鄭城東水有故石梁述征記曰鄭城東西十

四里各有石梁者也又北逕沈城北漢書地理志左馮

翊有沈陽縣王莽更之曰制昌也蓋藉水以取稱矣渭

水又東敷水注之水南出石山之敷谷北逕告平城東

者舊所傳言武王伐紂告太平於此故城得厥名非所



詳也敷水又北逕集靈宮西地理志曰華陰縣有集靈宮武帝起故張昶華嶽碑稱漢武慕其靈築宮在其後而北流注于渭渭水又東餘水注之水南出糧餘山之陰北流入于渭俗謂之宣水也渭水又東合黃酸之水世名之爲于渠水水南出升山北流注于渭渭水又東逕平舒城北城側枕渭濱半破淪水南面通衢昔秦始皇之將亡也江神素車白馬道華山下返璧于華陰平舒道曰爲遺鎬池君使者致之乃二十八年渡江所沈璧也卽江神返璧處也渭水之陽卽襄德縣界也城在渭水之北沙苑之南卽襄德縣故城也世謂之高陽城

非矣地理志曰禹貢北條荆山在南山下有荆渠卽夏后鑄九鼎處也王莽更縣曰德驩渭水又東逕長城北長澗水注之水南出太華之山側長城東而北流注于渭水史記秦孝公元年楚魏與秦接界魏築長城自鄭濱洛者也

又東過華陰縣北

渭水東南洛水入焉闕駟以爲漆沮之水焉曹瞞傳曰操與馬超隔渭水每渡渭輒爲超騎所衝突地多沙不可築城婁子伯說今寒可起沙爲城以水灌之一宿而成操乃多作縑囊以堙水夜汲作城立于是水之次也



渭水逕華陰縣故城北春秋之陰晉也秦惠文王五年改曰寧秦漢高帝八年更名華陰王莽之華壇也縣有華山山海經曰其高五千仞削成而四方遠而望之又若華狀西南有小華山也韓子曰秦昭王令工施鉤梯上華山以節柏之心為博箭長八尺棋長八寸而勒之曰昭王嘗與天神博于是神仙傳曰中山衛叔卿嘗乘雲車駕白鹿見漢武帝帝將臣之叔卿不言而去武帝悔求得其子度世令追其父度世登華山見父與數人博于石上勅度世令還山層雲秀故能懷靈抱異耳山上有二泉東西分流至若山雨滂湃洪津泛灑挂溜騰

虛直瀉山下有漢魏文帝二廟

一清按詳下文只是漢文帝廟耳魏字羨文也

太平寰宇記華陰縣有南北二廟北廟有古碑九所其一是漢鎮遠將軍段煨更修之碑黃門侍郎張景書魏文帝與鍾繇各于碑陰刻二十字此碑垂名海內南廟是華北君祠今有北君靈臺上仙下仙四神童院此即所謂二廟也但以南廟為華北君祠而北廟又廟有石不云是漢文帝祠不可臆解或是文有脫誤耳

闕數碑一碑是建安中立漢鎮遠將軍段煨更修祠堂碑文漢給事黃門侍郎張景造景自書之魏文帝又刊其碑陰二十餘字二書有重名垂于海內又刊侍中司隸校尉鍾繇宏農太守母邱儉姓名廣六行鬱然循平是太康八年宏農太守河東衛叔始為華陰令河東裴仲恂役其逸力修立壇廟夾道樹柏迄于山陰事見永



興元年華百石所造碑一清按隸釋華山有四碑一西嶽華山亭碑靈帝光和二年一宏農太守樊毅復華下民租碑光和二年一樊毅修華嶽碑光和二年俱云水經有今本無是四碑蓋缺失矣西嶽碑洪氏云在華陰縣威宗延熹四年袁逢守宏農郡以華嶽舊碑文磨滅遂案經傳載原本勒斯石以垂後會遷京兆乃勅都水掾杜遷市石遣書佐郎郭香察書碑成于後之四年蓋孫璆典郡時也又曰東漢循王莽之禁人無二名郭香察書者察涖他人之書耳小歐陽以為郭香察所書非也隸辨云額題云西嶽華山廟碑六篆字為二行碑式云文二十二行行三十七字袁府君肅恭明神及京兆尹勅杜遷市石皆平闕高祖太宗孝武並列行高出一字有紋如碁局碑云勅都水掾杜遷市石遣書佐郎郭香察書蓋一人市其石一人察其書律歷志有太史治歷郎中郭香豈其人與金石錄跋尾曰孝武皇帝修封禪之禮巡省五嶽立宮其下宮曰集靈宮殿曰存仙殿門曰望仙門歐陽公集古錄云所謂集靈宮者他書不見惟見此碑耳余按班固漢書地理志華陰有集靈宮武帝起而酈道元注水經亦云敷水北逕集靈宮引地

理志所載其語皆同然則不獨見于此碑矣而所謂存仙殿望仙門者諸書不載都氏穆金薤琳琅曰漢西嶽華山碑董氏書跋云集靈宮漢志既書之桓譚嘗賦之張景序曰世宗經集靈之宮三輔黃圖書其制度藝文類聚亦書其名則又金石錄之所未及者華山亭碑樊毅所立隸釋所謂華嶽有樊毅之碑三者也碑云毅字仲德集古錄集古錄目金石錄隸釋俱不著碑所在蓋亦在華山之上也復租碑及修華嶽碑集古錄目云在華州隸釋云復租碑全載光和二年十二月壬午奏牘無他詞修嶽碑云有漢元舅五侯之胄謝陽之孫按范書樊宏封壽張侯樊丹射陽侯樊尋元都侯樊忠更父侯樊茂平望侯樊氏侯者五國毅即丹之後也又金石錄目有西嶽石闕銘跋尾云永和元年五月癸丑朔六日戊午宏農太守常山元氏張勳為西嶽華山作石闕高二丈二尺永和漢順帝晉穆帝姚泓皆有此號穆帝時華陰不屬晉以此碑字畫驗之恐非姚泓時蓋漢刻也是碑景伯所未見即酈注渭水又東沙渠水注之水云廟有石闕數碑者是也

出南山北流西北入長安城城自華山北經于河華嶽



銘曰秦晉爭其祠立城建其左者也郭著述征記指證  
 魏之立長城長城在後不得言在斯斯為非矣渠水又  
 北注入渭渭水又東逕定城北西征記曰城因原立述  
 征記曰定城去潼關三十里夾道各一城渭水又東泥  
 泉水注之水出南山靈谷而北流注于渭水也渭水又  
 東合沙渠水水即符禺之水也南出符禺之山北流注  
 于渭

又東入于河

春秋之渭汭也左傳閔公二年虢公敗犬戎于渭隊服虔  
 曰隊謂汭也杜預曰水之隈曲曰汭王肅云汭入也呂

忱曰汭者水相入也水會即船司空所在矣地理志曰  
 渭水東至船司空入河服虔曰縣名都官全氏曰二字疑有訛誤  
 三輔黃圖有船庫官後改為縣王莽之船利者也

補  
 豐水

宋敏求長安志長安縣下引水經注曰豐水出豐溪西  
 北流分為二水一水東北流又北交水自東入焉又北  
 昆明池水注之又北逕靈臺西又北至石塢注于渭萬  
 年縣下云福水即交水也水經注曰水承樊川御宿諸  
 水出縣南山石壁谷南三十里與真谷水合亦名子午  
 谷水長安縣下引水經注曰交水又西南流與豐水支



津合其北又有漢故渠出焉又西至石塢分爲二水一水西流注豐水一水自石塢北逕細柳諸原北流入昆明池又石闔堰下引水經注云交水西至石塢漢武帝元狩三年穿昆明池所造一清按漢書地理志右扶風鄠縣豐水出東南北過上林苑入渭宋氏所引水經注今本失之而豐水源流較班志尤詳也禹貢錐指曰先儒皆云豐涇大川故曰會漆沮小水故曰過嘗考渭南本周之舊都西漢因之其後隋唐復建都于此歷代相承鑿引諸川以資汲取便轉輸漑民田灌苑囿津渠交絡離合不常凡地志水經所言類非禹迹之舊詩曰豐

水東注維禹之績則渭南諸川唯豐爲大自漢鴻嘉中王商穿長安城引內豐水注第中而其流漸微逮唐貞觀中堰豐鎬入昆明池二水于是斷流又于京城西北引豐水爲漕渠合鎬水北流由禁苑入渭而豐水之流愈微矣竊疑豐西之澇豐東之鎬滴霸漑禹時悉合豐以入渭故豐得成其大且詩言東注而漢志言北過上林苑入渭則是北流而非東注矣按豐水入昆明池不始於唐東樵云云由未見水經注逸文故也

補涇水

禹貢錐指曰周禮雍州其川涇汭水經無涇水之目渭



水篇中於入渭處僅附見一語而寰宇記原州平高縣  
笄頭山一名崆峒山下引水經注云蓋大隴山之異名  
莊子謂黃帝學道于廣成子蓋在此山百泉縣涇水下  
引水經云涇水出安定涇陽縣高山注云山海經曰高  
山涇水出焉東流注于渭入關謂之八水彈箏峽下引  
水經注云涇水逕都盧山山路之內常有如彈箏之聲  
行者聞之鼓舞而去又云弦歌之山峽口水流風吹滴  
崖響如彈箏之韻因名涇州靈臺縣蒲川水下引水經  
注云蒲川水出南山蒲谷東北合細川水又東北合且  
氏川水邠州宜祿縣芹川下引水經注云出羅川縣千

子山山一名千子嶺東流逕宜祿縣北寧州真寧縣大  
陵水下引水經注云大陵小陵水出巡河南殊川西南  
逕寧陽城故幽詩曰夾其皇澗陵水卽皇澗乾州永壽  
縣高泉下引水經注云甘泉山卽高泉山也耀州雲陽  
縣涇水下引水經注云涇水東流歷峽謂之涇峽五龍  
谷泉下引水經注云五龍水出雲陽宮西南雍州醴泉  
縣谷口城下引水經注云九嶷山東仲山西謂之谷口  
本文是九嶷山東連仲山西當涇水處故謂之谷口卽  
寒門也此皆言涇水而今本無之是水經元有涇水篇  
宋初尙存後乃亡之耳一清按寰宇記渭州潘源縣下



引水經注云良源縣有銅城山水出歷白石城隴州吳山縣下引水經注云南由縣有白環水出白環谷二條皆涇水注文而東樵失引之又漢書地理志安定郡烏氏縣都盧山在西師古曰氏音支九域志曰都盧峽卽彈箏峽又文選北征賦登赤須之長坂入義渠之舊城李善注云赤須阪在北地郡水經注赤須水出赤須谷西南流注羅水寰宇記曰真寧縣羅川水出羅山寧州古公劉邑春秋爲義渠戎國有義渠城卽漢書地理志北地郡義渠道也又初學記引水經注曰梁谷水西南注于涇又曰涇水逕望夷宮北臨涇水以望北夷秦二

世將祠涇沈四白馬於涇齋於此宮內又曰涇水逕長平觀北甘露三年呼韓邪單于入朝上登長平觀詔單于無謁卽是觀也又長安志醴泉縣下引水經注曰涇水導源安定朝那縣西笄頭山秦始皇巡地西出笄頭山卽是山也蓋大隴之異名又名勝志邠州淳化縣下引水經注云五龍水泉流逕長箱坂下方輿紀要云車箱坂水經謂之長箱坂諸所引文又在寰宇記之外錐指又曰元和志云漆水在新平縣西九里北流注于涇寰宇記云注水經曰漆水自宜祿界來又東過漆縣北今縣西九里有白土川東北流逕白土原東陳陽原西



又東北流注涇水此條亦是涇水篇逸文故不見於漆水注中也又漢志鹵縣濯水出西此則未知所在矣

補 芮水

太平寰宇記隴州汧源縣下引水經注云芮水出小隴山其川名汧邠州宜祿縣芮水下引水經注云芮水又東逕宜祿川俗謂之宜祿川水通典引水經云汧水州西四十里弦蒲藪東北流入平涼府華亭縣南又東逕崇信縣北至涇州城北又東南過長武縣北而東流合于涇水禹貢錐指曰涇屬渭汧傳曰水北曰汧春秋

傳註曰水之隈曲曰汧說文汧水相入也按二義適相成而不相悖蓋兩水相入其水會襟帶處必有限曲詩大雅芮鞠之卽芮卽職方涇汧之汧水名也漢志扶風汧縣下云芮水出西北東入涇詩芮隄雍州川也師古曰隄讀與鞠同余因悟水北曰汧之義蓋涇水東南流至邠州長武縣東芮水自平涼府靈臺縣界流逕縣南而東注于涇公劉所居故豳城正在二水相會內曲之處及其後人衆而地不能容則又營其外曲以居故曰止旅迺密芮鞠之卽鄭箋曰水之內曰隩水之外曰鞠外卽南內卽北也一清按涇汧各源汧流稍短不若涇



耳職方以二水為雍州川水經宜列于篇目故採擷羣書以補逸文

水經注釋卷十九終

水經注釋卷二十

仁和趙一清誠夫錄

漾水

丹水

漾水出隴西氏道縣蟠冢山東至武都沮縣為漢水

常璩華陽國記曰漢水有二源東源出武都氏道縣漾

山為漾水禹貢導漾東流為漢是也西源出隴西西縣

蟠冢山會白水逕葭萌入漢始源曰沔按沔水出東狼

谷逕沮縣入漢漢中記曰蟠冢以東水皆東流蟠冢以

西水皆西流即其地勢源流所歸故俗以蟠冢為分水

嶺即此推沔水無西入之理劉澄之云有水從河陽縣



一清按漢書高帝紀師古曰阿陽天水之縣也今流俗書本或作河陽者非也章懷後漢書注亦云然則寫阿陽為河陽其來舊矣南至梓潼漢壽入大穴暗通岷山郭景純亦

言是矣岷山穴小本不容水水成大澤而流與漢合庾仲邕又言漢水自武遂川南入蔓葛谷越野牛逕至開城合西漢水故諸言漢者多言西漢水至葭萌入漢又曰始源曰沔是以經云漾水出氐道縣東至沮縣為漢水東南至廣魏白水診其泐注似與三說相符而未極西漢之源矣然東西兩川俱受沔漢之名者義或在茲矣班固地理志司馬彪袁山松郡國志竝言漢有二源東出氐道西出西縣之嶓冢山闕駟云漢或為漾漾水

出崑崙西北隅至氐道重源顯發而為漾水又言隴西西縣嶓冢山在西西漢水所出南入廣魏白水又云漾水出獮道東至武都入漢許慎呂忱竝言漾水出隴西獮道東至武都為漢水不言氐道然獮道在冀之西北又隔諸川無水南入疑出獮道之為謬矣又云漢漾也東為滄浪水山海經曰嶓冢之山漢水出焉而東南流注于沔然東西兩川俱出嶓冢而同為漢水者也孔安國曰泉始出為漾其猶濛耳而常璩專為漾山漾水當是作者附而為山水之殊目矣余按山海經漾水出崑崙西北隅而南流注于醜塗之水穆天子傳曰天子自



春山西征至于赤烏氏己卯北征庚辰濟于洋水辛巳入于曹奴曹奴之人戲觴天子于洋水之上乃獻良馬九百牛羊七千天子使逢固受之天子乃賜之黃金之鹿戲乃膜拜而受余以太和中從高祖北巡狄人猶有此獻雖古今世殊而所貢不異然川流隱伏卒難詳照地理潛閎變通無方復不可全言闕氏之非也何氏曰山海經洋音詳不可竟指為漾以證闕駟之說 雖津流派別枝渠勢懸原始要終潛流或一故俱受漢漾之名納方土之稱是其有漢川漢陽廣漢漢壽之號或因其始或據其終縱異名互見猶為漢漾矣川共目殊或亦在斯今西縣嶓冢山西漢

水所導也然微涓細注若通羣歷津注而已西流與馬池水合水出上邽西南六十餘里謂之龍淵水言神馬出水事同涂吾來淵之異故因名焉開山圖曰隴西神馬山有淵池龍馬所生即是水也其水西流謂之馬池川又西流入西漢水西漢水又西南流左得蘭渠溪水次西有山黎谷水次西有鐵谷水次西有石耽谷水次西有南谷水竝出南山揚湍北注右得高望谷水次西得西溪水次西得黃花谷水咸出北山飛波南入西漢水又西南資水注之水北出資川導源四壑南至資峽總為一水出峽西南流注西漢水西漢水又西南得峽



石水口水出苑亭西草黑谷三溪西南至峽石口合爲一瀆東南流屈而南注西漢水西漢水又西南合楊廉川水水出西谷衆川瀉流合成一川東南流逕西縣故城北秦莊公伐西戎破之周宣王與其大駱犬邱之地爲西垂大夫亦西垂官也王莽之西治矣建武八年世祖至河陽竇融等悉會天水震動隗囂將妻子奔西城從楊廣廣死囂愁窮城守時潁川賊起車駕東歸畱吳漢岑彭圍囂岑等壅西谷水以縑幔盛土爲隄灌城城未沒丈餘水穿壅不行地中數丈涌出故城不壞王元請蜀救至漢等退還上却但廣廉字相狀後人因以人

名名之故習譌爲楊廉也置楊廉縣焉又東南流右會茅川水水出西南戎溪東北流逕戎邱城南吳漢之圍西城王捷登城向漢軍曰爲隗王城守者皆必死無二心願諸將亟罷請自殺以明之遂刎頸而死又東北流注西谷水亂流東南入于西漢水西漢水又西南逕始昌峽直始昌縣故城西晉書地道記曰天水始昌縣故西城也亦曰清崖峽西漢水又西南逕宕備戍南左則宕備水自東南西北注之右則鹽官水南入焉水北有鹽官在嶓冢西五十許里相承管煮不輟味與海鹽同故地理志云西縣有鹽官是也其水東南逕宕備戍西



東南入漢水漢水又西南合左谷水水出南山窮溪北注漢水又西南蘭臯水出于西北五交谷東南歷祁山軍東南入漢水漢水又西南逕祁山軍南雞水南出雞谷北逕水南縣西北流注于漢漢水又西建安川水入焉其水導源建威西北山白石戍東南二源合注東逕建威城南又東與蘭坑水會水出西南近溪東北逕蘭坑城西東北流注建安水建安水又東逕蘭坑城北建安城南其地故西縣之歷城也楊定自隴右徙治歷城卽此處也去仇池一百二十里後改爲建安城其水又東合錯水水出錯水戍東南而東北入建安水建安水

又東北有雉尾谷水又東北有太谷水又北有小祁山水竝出東溪揚波西注又北左會胡谷水水西出胡谷東逕金盤歷城二軍北軍在水南層山上其水又東注建安水建安水又東北逕塞峽元嘉十九年宋太祖遣龍驤將軍裴方明伐楊難當難當將妻子北奔安西參軍魯尙期追出塞峽卽是峽矣左山側有石穴洞人言潛通下辨所未詳也其水出峽西北流注漢水漢水北連山秀舉羅峯競峙祁山在嶓冢之西七十許里山上有城極爲巖固昔諸葛亮攻祁山卽斯城也漢水逕其南城南三里有亮故壘壘之左右猶豐茂宿草蓋亮所



植也在上邽西南二百四十里開山圖曰漢陽西南有  
祁山蹊徑逶迤山高巖嶮九州之名咀天下之奇峻今  
此山于衆阜之中亦非爲傑矣漢水又西南與甲谷水  
合水出西南甲谷東北流注漢水漢水又西逕南岬北  
岬之中上下有二城相對左右墳隴低昂亘山被阜古  
語云南岬北岬萬有餘家諸葛亮表言祁山去沮縣五  
百里有民萬戶矚其邱墟信爲殷矣漢水西南逕武植  
戍南武植戍水發北山二源奇發合于安民戍南又南  
逕武植戍西而西南流注于漢水漢水又西南逕平夷  
戍南又西南夷水注之水出北山南逕其戍西南入漢

水漢水又西逕蘭倉城南又南右會兩溪俱出西山東  
流注于漢水張華博物志云溫水出烏鼠山下注漢水  
疑是此水而非所詳也漢水又南入嘉陵道而爲嘉陵  
水世俗名之爲階陵水非也漢水又東南得北谷水又  
東南得武階水又東南得倉谷水右三水竝出西溪東  
流注漢水漢水又東南逕瞿堆西又屈逕瞿堆南絕壁  
峭峙孤嶮雲高望之形若覆壺其高二十餘里羊腸蟠  
道三十六迴開山圖謂之仇夷所謂積石嵯峨嶽岑隱  
阿者也上有平田百頃煮土成鹽因以百頃爲號山上  
豐水泉所謂清泉湧沸潤氣上流者也漢武帝元鼎六



年開以為武都郡天池大澤在西故以都為目矣王莽  
 更名樂平郡縣曰循虜常璩范曄云郡居河池一名仇  
 池池方百頃即指此也左右悉白馬氏矣漢獻帝建安  
 中有天水氏楊騰者世居隴右為氏太師子駒勇健多  
 計徙居仇池魏拜為百頃氏王漢水又東合洛谷水水  
 有二源同注一壑於神蛇戍西左右山溪多五色蛇性  
 馴良不為物毒洛谷水又南逕虎馘戍東又南逕仇池  
 郡西瞿堆東西南入漢水漢水又東合洛漢水水北發  
 洛谷南逕威武戍南又西南與龍門水合水出西北龍  
 門谷東流與橫水會東北窮溪即水源也又南逕龍門

戍東又東南入洛漢水又東南逕上祿縣故城西修源  
 濬導逕引北溪南總兩川單流納漢漢水又東南逕濁  
 水城南又東南會平洛水水出武階東北四十五里更  
 馳南溪導源東北流山側有甘泉涌波飛清下注平洛  
 水又逕甘泉戍南又東逕平洛戍南一清按漢志武都  
 郡有平樂道即平  
洛戍也道元時  
 其縣已廢省矣又東入漢謂之會口漢水東南逕修城

道南與修水合水總二源東北合漢漢水又東南於槃  
 頭郡南與濁水合水出濁城北東流與丁令溪水會其  
 水北出丁令谷南逕武街城西東南入濁水濁水又東  
 逕武街城南故下辨縣治也李倉李稚以氏王楊敵堅



妻死葬陰平襲武街為氏所殺於此矣

一清按華陽國志十六國春秋

李倉作李玲又氏王楊難敵堅頭乃兄弟二人此云楊敵堅蓋誤文也

今廣業郡治濁水

又東宏休水注之水北出溪南逕武街城東而南流注

於濁水濁水又東逕白石縣南續漢書曰虞詡為武都

太守下辨東三十餘里有峽峽中有泉生大石障塞水

流春夏輒潰溢敗壞城郭詡使燒石以醋灌之石皆碎

裂因鑄去焉遂無泛溢之害濁水即白水之異名也濁

水又東南湓陽水北出湓谷南逕白石縣東而南入濁

水濁水又東南與仇鳩水合水發鳩溪南逕河池縣故

城西王莽之樂平亭也其水西南流注濁水濁水又東

南與河池水合水出河池北谷南逕河池戍東西南入

濁水濁水東南兩當水注之水出陳倉縣之大散嶺西

南流入故道川謂之故道水西南逕故道城東魏征仇

池築以置戍與馬鞍山水合水東出馬鞍山歷谷西流

至故道城東西入故道水西南流北川水注之水出北

洛櫛山南南流逕唐倉城下南至困豕川入故道水故

道水又西南歷廣香交合廣香川水水出南田縣利喬

山一清按郡國志劉昭補注引秦州記曰上邽縣北有

利山川中平地有土堆高五丈生細竹翠茂殊常二

楊樹大數十圍百姓祀之朱氏南流至廣香川謂之廣

香川水一清按蕭齊建元元年葭萌戍主楊廣又南注



故道水謂之廣香交故道水又西南入秦岡山尙婆水  
 注之山高入雲遠望增狀若嶺紆曦軒峯在月駕矣懸  
 崖之側列壁之上有神象若圖指狀婦人之容其形上  
 赤下白世名之曰聖女神至於福應愆違方俗是祈水  
 源北出利喬山南逕尙婆川謂之尙婆水一清按元和郡縣志云尙婆水本名石磐水水多磐石因以為名俗語音訛故云尙婆歷兩當縣之尙婆城南  
 魏故道郡治也西南至秦岡山入故道水故道水又右  
 合黃盧山水水出西北天水郡黃盧山腹歷谷南流交  
 注故道水故道水南入東益州之廣業郡界與沮水枝  
 津合謂之兩當溪水上承武都沮縣之沮水瀆西南流

注於兩當溪虞詡為郡漕穀布在沮從沮縣至下辨山  
 道嶮絕水中多石舟車不通驢馬負運僦五致一詡乃  
 於沮受僦直約自致之即將吏民按行皆燒石樵木開  
 漕船道水運通利歲省萬計以其僦廩與吏士年四十  
 餘萬也又西南注于濁水濁水南逕槃頭郡東而南合  
 鳳溪水水上承濁水於廣業郡南逕鳳溪中有二石雙  
 高其形若闕漢世有鳳凰止焉故謂之鳳凰臺北去郡  
 三里水出臺下東南流左注濁水濁水又南注漢水漢  
 水又東南歷漢曲逕挾崖與挾崖水合水西出擔潭交  
 東流入漢水漢水又東逕武興城南又東南與北谷水



合水出武興東北而西南逕武興城北謂之北谷水南轉逕其城東而南與一水合水出東溪西流注北谷水又南流注漢水漢水又西南逕關城北除水出西北除溪東南流入于漢漢水又西南逕通谷通谷水出東北通溪上承漾水西南流為西漢水漢水又西南寒水注之水東出寒川西流入漢漢水又西逕石亭戍廣平水西出百頃川東南流注漢又有平阿水出東山西流注漢水漢水又逕晉壽城西而南合漢壽水水源出東山西逕東晉壽故城南而西南入于漢水也

又東南至廣魏

一清按此篇及羌水涪水梓潼水經文俱作廣魏胡氏曰廣魏者故廣漢也蓋曹氏

改名漢後人續經此其一證何氏曰亭林云魏書崔浩傳浩工書人多託寫急就章必稱馮代疆以示不敢犯國史于馮代疆下注曰疑按急就篇有馮漢疆魏初國號曰代故改漢疆為代疆酈道元以廣漢為廣魏即此例也據此則非由曹氏改名是又一義也白水縣西又東南至葭萌縣東北與羌水合

白水西北出於臨洮縣西南西傾山

一清按漢志廣漢郡甸氏道白水出

徼外東至葭萌入漢過郡一行九百五十里

水色白濁東南流與黑水合水

出羌中西南逕黑水城西又西南入白水白水又東逕

洛和城南洛和水西南出和溪東北流逕南黑水城西

而北注白水白水又東南逕鄧至城南又東南與大夷

祝水合水出夷祝城西南而窮溪北注夷水又東北合



羊洪水出東南羊溪西北逕夷祝城東又西北流屈而東北注于夷水夷水又東北入白水白水又東與安昌水會水源發衛大西溪東南逕鄧至安昌郡南又東南合無累水無累水出東北近溪西南入安昌水安昌水又東南入白水白水又東南入陰平得東維水水出西北維谷東南逕維城西東南入白水白水又東南逕陰平道故城南王莽更名摧虜矣即廣漢之北部也廣漢屬國都尉治漢安帝永初三年分廣漢蠻夷置有白馬水出長松縣西南白馬溪東北逕長松縣北

一清按隋書地理志

武都郡長松縣西魏置初曰建昌開皇十八年改曰白馬溪長松此昔人所謂未必不間及隋唐者也吁可怪已而

東北注白水白水又東逕陰平大城北蓋其渠帥自故城徙居也白水又東偃溪水出西南偃溪東北流逕偃城西而東北流入白水白水又東逕偃城北又東北逕橋頭昔姜維之將還蜀也雒州刺史諸葛緒邀之於此後期不及故維得保劍閣而鍾會不能入也白水又與羌水合自下羌水又得其通稱矣白水又東逕郭公城南昔郭淮之攻廖化于陰平也築之故因名焉白水又東雒川水出西南雒溪東北注白水白水又東合空冷水傍溪西南窮谷即川源也白水又東南與南五部水會水有二源西源出五部溪東南流東源出郎谷西南合



注白水白水又東南逕建陽郡東

一清按兩漢晉宋後魏地志俱無建陽郡

之名名勝志引此文作建昌郡則西魏析陰平所置也

以地望而言宇文會置建昌縣後改曰長松建昌疑即

上長松之舊稱然皆在孝昌以後道元何由得舉之乎

或曰此後魏梁州之華陽郡也建陽疑華陽之訛未詳

是而非北與一水合二源同注共成一溪西南流入於白

水白水又東南逕白水縣故城東即白水郡治也經云

漢水出其西非也白水又東南與西谷水相得水出西

溪東流逕白水城南東南入白水白水又南左會東流

水東入極溪即水源也白水又南逕武興城東又東南

左得刺稽水口溪東北出便水源矣白水又東南清水

左注之庾仲雖曰清水自祁山東合白水斯為孟浪也

水出於平武郡東北

一清按隋書地理志云平武郡西魏置

矚累互下南

逕平武城東屈逕其城南又西歷平洛郡東南屈而南

逕南陽僑郡東北又東南逕新巴縣東北又東南逕始

平僑郡南又東南逕小劍戍北西去大劍三十里連山

絕嶮飛閣通衢故謂之劍閣也張載銘曰一人守嶮萬

夫趨趨信然故李特至劍閣而歎曰劉氏有如此地而

面縛於人豈不奴才也小劍水西南出劍谷東北流逕

其戍下入清水清水又東南注白水白水又東南逕吐

費城南即西晉壽之東北也東南流注漢水西晉壽即

蜀王弟葭萌所封為葭侯邑故遂名城為葭萌矣劉備



改曰漢壽太康中又曰晉壽水有津關

一清按通鑑注引水經注云白

水東南流至葭萌縣謂之葭萌水水有津關所謂白水關今本似有脫文

段元章善風角弟

子歸元章封筒藥授之曰路有急難開之生到葭萌從者與津吏諍打傷開筒得書言其破頭者可以此藥裹之生乃歎服還卒業焉亦廉叔度抱父柩自沈處也

又東南過巴郡閬中縣

巴西郡治也劉璋之分三巴此其一焉闕駟曰強水出陰平西北強山一曰強川姜維之還也鄧艾遣天水太守王頎敗之于強川卽是水也其水東北逕武都陰平梓潼南安入漢水漢水又東南逕津渠戍東又南逕閬

中縣東閬水出閬陽縣而東逕其縣南又東注漢水昔劉璋之攻霍峻于葭萌也自此水上張達范彊害張飛

於此縣漢水又東南得東水口水出巴嶺南歷獠中謂之東遊水李壽之時獠自牂柯北入所在諸部布滿山谷其水西南逕宋熙郡東又東南逕始平城東又東南

逕巴西郡東又東入漢水漢水又東與濩溪水合水出獠中世亦謂之爲清水也東南流注漢水漢水又東南

逕宕渠縣東又東南合宕渠水西北出南鄭縣巴嶺與槃余水同源派注南流謂之北水東南流與難江水合

水出東北巴山

一清按寰宇記集州難江縣引此注作小巴山云小巴嶺在縣東

西南



注之又東南流逕宕渠縣謂之宕渠水又東南入于漢

又東南入漢州江津縣東南入于江一清按此條經文誤也尚書古文疏證曰

胡肫明曰水經魏晉人續成自後間有附益亦未必不及

隋唐頃讀至漾水未有漢州江津縣大驚曰此非隋唐人

筆乎漢乃渝字之譌渝州江津縣今屬重慶府本州治巴

縣地西魏分置江陽縣隋改曰江津巴縣在東江津在西

漢水不得過江津也再三推尋不知其故及讀至羌水篇

云出羌中東南至廣魏白水縣與漢水合又東南至巴郡

閬中縣又南至墊江東南入于江憬然悟曰羌水合白水

東南至白水縣與漢水合蓋漢水入江之道即羌水入江

之道自閬中以下經文與此字字相同今本之誤蓋由東

南入于江之上字有空缺妄庸人率意填補耳非續經也

墊江今合州漢水流逕州東涪水自州西南來注之正酈

氏所云涪水注之庾仲雍所謂涪內水者也若作渝州江

津縣則涪漢之合遠在上流經注齟齬矣東南入漢州江

津七字當改作南至墊江四字入字尤非水經敘次水所

逕過之郡之縣未有入字者潛邱以經文有空缺為妄

庸人所填寫非魏晉以後續經真卓識也東樵既面與論

涪水注之庾仲雍所謂涪內水者也

一清按漢水班志

證及作錐指據漢書地理志隴西西縣下云禹貢嶓冢山

西漢水所出南入廣魏白水東南至江州入江之文更定

作又東南逕江州縣東南入于江而不從閬說江州江津

俱屬巴郡第江州漢縣而江津則隋置耳且漢州唐垂拱

二年始立此名明是不學者妄為填寫潛邱乃改作渝州

涪水注之庾仲雍所謂涪內水者也

一清按漢水班志

以實其為隋唐人之筆何至曲為之說如此耶江水篇云

又東北至巴郡江州縣東強水涪水漢水白水岩渠水五

水合南流注之足相證明東樵以班志為據較疏證似長

分水經又有漾沔異篇之目後之言禹貢者山川迄無

定位莫能折衷黃文叔尚書說曰漢有沔漾之名皆東

涪水注之庾仲雍所謂涪內水者也

一清按漢水班志

漢水也地理志西漢水出西縣嶓冢山南入廣漢白水

蓋潛漢也經不著其所出自古皆以為東西兩漢俱出

嶓冢則或然矣而西漢固無沔漾之名漢志漾水出隴

西氏道至武都為漢武都東漢水受氏道水一名沔是

則沔漾俱為東漢也獨氏道武都脈絡不通川渠阻隔

涪水注之庾仲雍所謂涪內水者也

一清按漢水班志

武都受漾為不可據而桑欽遂徙氏道漾水為西漢之

源由是愈紛錯酈道元委曲遷就通之以潛伏之流證

之以難驗之論更覺齟齬故當盡廢諸說而一之以經

水經注

卷二十一 東潛趙氏定本



文杜佑通典秦州上邽縣嶓冢山西漢水所出經嘉陵  
 曰嘉陵江經閬中曰閬中江漢中金牛縣嶓冢山禹貢  
 漾水至此為漢水亦曰沔水其說為可據常璩華陽國  
 志漾水出嶓山嶓山尋求不得其處漢志沮縣沮水出  
 東狼谷中水經推為沔水之源是否姑存之要與孔傳  
 不同矣胡身之通鑑注云據禹貢則漢水源于漾據水  
 經則漾會于涪沔入于江所出異源所入異派據班志  
 則漾出氏道至武都為漢水而東漢受氏道水通謂之  
 沔過江夏而入于江則漾沔似合為一矣然又言沮水  
 出沮縣南至沙羨入江與水經所謂沔水即沮水說似  
 不合而實合也夫道元之曲護經文誠如黃說然其言  
 嶓冢有二東西兩漢異源同流是豈竟無別白耶若程  
 泰之禹貢論力排水經反覆于東出西南其向曉曉不  
 置近世胡肫明作禹貢錐指首列導漾圖又作東西二  
 源圖可謂詳且備矣然不能于班志原文一加審諦即  
 道元之注亦未之深察故立言之旨猶有所蔽今略舉  
 其書曰按後魏地形志華陽郡嶓冢縣有嶓冢山漢水  
 出焉唐六典山南道名山曰嶓冢嶓冢縣故城在今陝  
 西漢中府沔縣西南四十里西南接寧羗州界今在州  
 北九十里山海經漢水出鮒嶓山蓋嶓冢之異名也本

在漢中郡沔陽縣界後魏正始中析沔陽置嶓冢縣屬  
 華陽郡故地形志云其縣有嶓冢山隋省沔陽入嶓冢  
 屬梁州大業初改置西縣故隋志云西縣有嶓冢山唐  
 武德二年分利州綿谷縣之通谷鎮置金牛縣而山入  
 其境故括地志云嶓冢山在金牛縣東二十八里通典  
 云金牛縣有嶓冢山四年又分綿谷置三泉縣寶歷初  
 省金牛入三泉故寰宇記云嶓冢山在三泉縣東宋至  
 道二年升三泉縣為大安軍紹興三年改建軍于西縣  
 界復置三泉縣隸軍故輿地紀勝引宋朝郡縣志云今  
 之言漢水以西縣之嶓冢山為源後又省三泉入軍故  
 地理通釋云嶓冢山在大安軍西元降軍為縣故大一  
 統志云漢水源出大安縣嶓冢山明初以其地改置沔  
 縣又於縣西南置寧羗衛成化二十二年即衛置州而  
 蓋此山本在漢沔中府志云嶓冢山在寧羗州北九十  
 里之所在曰嶓冢曰西縣曰金牛曰三泉曰大安曰寧  
 羗地名六變而山則一皆在古梁州之域其為禹貢之  
 嶓冢無疑也又云嶓冢山孔傳不言所在之郡縣而正  
 義引地理志以實之曰隴西郡西縣嶓冢山西漢水所  
 出夫此水即嘉陵水之上源非禹貢之所謂嶓冢導漾



東流為漢者也而班固以西縣之嶓冢為禹貢之嶓冢  
 謬矣自是以後言嶓冢者率依班氏自後魏正始中析  
 沔陽地置嶓冢縣以表其山而名始著酈道元卒于孝  
 昌二年上距正始置縣之時凡二十餘歲本朝典故生  
 所親見而注水經不言豈事在成書之後不及追改抑  
 亦因其晚出而疑之乎然漾水注引漢中記曰嶓冢以  
 東水皆東流嶓冢以西水皆西流故俗以嶓冢為分水  
 嶺作者亦似知班志之謬而以禹貢嶓冢為當在漢中  
 也者不然于漢中記奚為詳及隴西之山邪穎達豈未  
 之考乎然班志雖以西縣嶓冢為禹貢之山而養水自  
 繫氏道之下不言出某山自水經云漾水出氏道縣嶓  
 冢山而氏道亦有嶓冢矣常璩華陽國志云東源出武  
 都氏道縣漾山為漾水而氏道之嶓冢且有漾山之目  
 矣郭璞注山海經云嶓冢今在武都氏道縣南酈道元  
 注水經云東西兩源俱出嶓冢而同為漢水則似一山  
 跨二縣之境而在西縣者為西源在氏道者為東源矣  
 輾轉迷惑愈久而西縣者為西源在氏道者為東源矣  
 故城在今秦州西南氏道不知所在蓋自晉永嘉之亂  
 隴西沒于氏羌郡縣荒廢常璩郭璞皆云氏道屬武都  
 而晉志武都郡無之則其縣之不可考久矣要之二縣

在隴西皆古雍州域也而禹貢嶓冢乃梁州之山不應  
 闌入雍域故惟魏收所言為得其實又云漢志隴西西  
 縣下云禹貢嶓冢山行二千七百六十里此與氏道之  
 至江州入江過郡四行二千七百六十里此與氏道之  
 養水全無交涉水經非一時一手作漾水篇首云漾水  
 出隴西氏道縣嶓冢山東至武都沮縣為漢水此不過  
 依漢志氏道一條以立文惟加嶓冢沮縣為漢水此不過  
 所謂漢水即東漢也亦與西縣之西漢全無交涉首尾  
 橫決必魏晉間人所續也尋其意旨蓋以氏道水南合  
 濁水兩當溪歷槃頭郡東而南為西漢水也故酈注以  
 為東西兩川俱出嶓冢而通要皆自東入西非自西入東  
 漾沮雖有枝津與西漢通要皆自東入西非自西入東  
 也蓋嶓冢亘絕東西俗謂之分水嶺地勢東高而西下  
 故西漢水自略陽縣南入寧羌州界即折而西南避高  
 就下其性則然豈有東入之理澄之所謂言即禹貢之潛  
 仲邕所言即通谷水也二水皆東漢之枝津西流入西  
 漢水而說者乃謂西漢水至葭萌入漢顛倒之矣今嶺  
 東漾沮枝津皆入西漢嶺西谿澗之水亦皆入西漢川  
 流去來有目者盡能驗之其可謂古而非今乎又曰水  
 經依漢志以為言漢志以沮水枝津上承氏道水下為



東漢水氏道雖未詳其處所以地望度之當在西縣之東河池之西上邽之南下辨之北濁水所受有丁合溪水宏休水渥陽水皆出其北蓋自氏道來也其中或有漢志所謂養水者但今無可考耳然沮水枝津上承沮瀆自東入西非自西入東也昔之觀水作記者不察地勢之高下不辨川流之去來遂以為氏道養水合濁水兩當溪由枝津以達沮沔是為東漢之源而不知其非也班固因之故有此誤水經于武都下加沮縣二字蓋亦以氏道水通沮水為東漢之源也然漢志不言養水出何山而水經復附會之曰岷山則氏道亦有岷山矣常璩知其非是故又因水以名其山曰漾山而為之殊目要之氏道水所出別是一山非岷山也又云陸游曰嘗登岷山有泉涓涓出山間是為漢水之源務觀入蜀塗歷金牛目驗得之涓涓細流安國傳所謂泉始出山為漾水也新城王尚書士禎撰蜀道驛程記其言岷漢最為詳覈記曰出岷縣西門曲折行亂山中沔水流逕其中略如棧道但山庫無林木沔流舒緩不及褒水湍悍耳西涉沮水抵大安驛狹者才二三尺沙石磷磷深不沒踝自大安西南亂山益稠至金牛驛北望見岷山峩然雲表一小水自西東流即所謂岷山導

漾者也水纔濫觴不沒鳧雁合五丁峽水東流為沔其流始大金牛驛西三里稍南入五丁峽一名金牛峽口懸崖萬仞陰風颯然水自峽中噴薄而出寧羌州在亂山中無城堞本沔縣羊鹿坪地明洪武中以山寇作亂置寧羌衛于此成化中即衛建州治自州行十里渡水過百牢關關下有分水嶺嶺東水皆北流五丁峽水北合漾水入沔嶺西水皆南流迤七盤關龍洞合嘉陵水為川江常璩言沔出岷山有二一在天水為西漢明與導漾之交相悖按通典岷山有西漢水在二縣源出岷山與馬池水合此乃上邽之岷山在今秦州漢江源出沔縣岷山東流入金州此乃金牛之岷山禹貢岷山導漾乃沔縣之岷山非秦州之岷山知岷山有二則東西二漢源流各自了然漾之與沔本為一流與龍西之岷家都無交涉常氏之誤不可不辨而自明矣又云禹貢以岷山繫梁州而漢志岷山在雍域之隴西一誤也禹貢云岷道二誤也禹貢之潛乃岷水枝津西出為西漢水而漢志西漢水出西縣之岷山是漢志不言漾水出何山而水經云出岷道縣岷山是漢道亦有岷山



四誤也漾者東漢之源而續水經者以西漢水接漾水  
 為一川五誤也漾源入漢六誤也川流地上離合灼然可  
 云西漢水至葭萌入漢六誤也川流地上離合灼然可  
 見而酈注惑闕駟之說以為原始要終潛流或一故東  
 西俱受漢漾之名七誤也羣言殺亂學者靡所折衷今  
 說漢水當排棄諸家專主禹貢以沮沔為漢之別源以  
 西漢為漾之枝津而氏道水則存而不論是亦理亂絲  
 解連環之術也東樵之言剖判辨析幾無贖義而鄙意  
 則猶有未安者水經以漾水冒于西漢之上而東漢之  
 源僅以沮沔枝津當之是其大錯而以爲誤始班志竊  
 謂不然班志隴西西縣下云禹貢嶓冢山西漢水所出  
 猶恐人誤以西漢水即禹貢之漢水于氏道下云禹貢  
 養水所出至武都為漢武都下云東漢水受氏道水一  
 名沔過江夏謂之夏水入江漢中沔陽下云沔水出武  
 都東南入江氏道水今人既不知氏道之所在  
 又烏能必養水之不出于氏道乎夫河源渺茫隔在異  
 域尙可追尋况氏道雖陷氏羌當漢盛時猶隸版籍班  
 氏之記載非盡無稽也由氏道而沔而漢以入于江源  
 流脈絡條貫分明又武都沮縣下云沮水出東狼谷南  
 至沙羨入江夫沮即沔也狼谷即嶓冢也隴西之嶓冢

西漢之所出氏道之養水乃大禹之所導班志明言之  
 而猶歸過于班氏班氏不受也道元知水經漾水之誤  
 也于是欲于禹貢嶓冢導漾之外別求一漾水以彌縫  
 其失而卒不可得也乃東樵則以此魏書地形志華陽郡  
 嶓冢縣有嶓冢山漢水出焉執此文以詆班志華陽郡  
 漾水出自漢中之嶓冢前此山海經則以詆班志華陽郡  
 經則以為東狼谷至後魏乃因漾水在是為所出之山  
 而名之曰嶓冢雖有經記可憑然在漢時嶓冢自在隴  
 西漾水自出氏道豈能逆料五百餘年以後之所謂  
 而強為附和哉道元于沔水東南流注漢曰沮口下稱  
 所謂沔漢者也尙書禹貢嶓冢導漾東流為漢山海經  
 所謂酈禹山也補正之功不淺猶云成書未及追改使  
 酈亭負此長冤而復據陸王征途所記以為目驗得之  
 夫二子即博學嗜古其所涉歷按遽乘傳于川脈之遙  
 修山礮之綿阻不過望而測之世代悠邈荆蕪沒而  
 率然斷以氏道水之與沮沔相通殆非篤論也已況  
 夫嶓冢一山誠非小弱也禹貢梁州云嶓冢既藝導山  
 云導嶓冢至于荆山岷山之陽至于衡山導水云嶓冢  
 導漾東流為漢岷山導江東別為沱兩兩比較書法重  
 輕嶓之與岷未云多讓東樵亦云觀漢志云岷山在徼



外則固不可以前氏一縣限之會是與岷之知岷山脈之長而不  
 可以前氏一縣限之會是與岷之知岷山脈之長而不  
 一縣限之乎程克齋春秋分記曰梁州左山皆曰岷右  
 山皆曰岷出于岷者皆曰江出于岷者皆曰漢江有內  
 水中水外水之異漢有西漢水東漢水之殊蓋自秦州  
 東望則為雍之岷豕自寧羌州西望則為梁之岷豕禹  
 貢表之于梁而不繫之于雍則以導漾之功致力于梁  
 而不于雍耳真通儒之言也朝廷欽頒書經傳說彙  
 纂云岷豕有二一在鞏昌府秦州西南六十里西北九十里東  
 漢水所出一在鞏昌府秦州西南六十里西北九十里東  
 二水南北相去三四百里支派隱然聯屬所謂隴東之  
 山皆岷豕也何其明白易曉與故謂東漢水不出自隴  
 西之岷豕可謂隴西之岷豕必非禹貢之岷豕不可謂  
 禹貢之漾水出于寧羌州之岷豕可謂禹貢之岷豕必  
 僅在寧羌州則不可也爾雅音義曰有水從漢中沔陽  
 縣南流至梓潼漢壽入大穴中通峒山下西南潛出一  
 名沔舊俗云即禹貢潛也然潛水實受西漢水鄭康成  
 所謂漢別為潛大禹自導漢疏通即為西漢水也經云  
 岷豕既藝沱潛既導繫沱潛于岷豕之下烏知禹貢之  
 言漢不兼東西二源乎荆州貢道云浮于江沱潛漢足

明四水之相通矣漢人說經各有師承康成大儒必不  
 妄道三卿為眾吾舍鄭公將何從乎同時閻百詩最不  
 信古文力攻以為偽書并謂孔安國傳出自東晉梅頤  
 手然其說岷豕東西兩漢水同源樵所云者其尚書古文疏證曰  
 志以隴西西縣之岷豕為非禹貢之所有氏道之養水  
 為非大禹之所導如東樵所云者其尚書古文疏證曰  
 東西兩漢水異源同流按水經以漾水出隴西氏道縣  
 岷豕山東至武都沮縣為漢水為漢水者為西漢水也  
 故下文云又東南至廣魏與白水合又東南至葭萌縣  
 與羌水合酈氏注云今西縣岷豕山合又東南至葭萌縣  
 是遙承班固地理志來不見有禹貢字是道元以班志  
 西縣禹貢字為非而不顯駁之古人文多隱約水經以  
 沔水出武都沮縣東狼谷中為東漢水又言沔水東南  
 逕沮水成而東南流注漢酈氏注特標出尚書曰岷豕  
 導漾東流為漢以大禹當日所導實在于此亡友顧景  
 范謂水經不詳漢水所自出沔水沮水特入漢之小水  
 耳反詳志其源忘卻出今寧羌州者何與其說極是余  
 請兩言以剖別之曰酈道元謂東西兩川俱出岷豕猶  
 言各出岷豕云爾而為漢水猶言同名漢水云爾又  
 曰按孔安國傳曰泉始出山為漾水東南流為沔水至



漢中東流為漢水遙與前逾于沔傳漢上曰沔相照應  
 補出此句最佳余欲以班志沮縣下注沮水出東狼谷  
 南至沙羨南入江取武都縣下注一名沔過江夏謂之  
 夏水十字補入東狼谷之下南至沙羨之上漢水原委  
 方備又曰常璩稱漢有二源以東源為即禹貢之漾水  
 極是與水經各一書非承水經而為文者獨道元于水  
 經以西漢水為漾水曲徇其說寧取山海經闕氏荒誕  
 之說曰川流有潛通之理故漾漢互稱至敘次通谷水  
 曰上承漾水西南流為漢水漾水之稱仍屬東漢酈氏  
 微意居然可睹矣潛邱之言如此是故山連麓而水異  
 源山連麓故上邽之嶓冢與金牛之嶓冢皆為禹貢之  
 山水異源故西漢水為大禹所疏通則已著于康成之  
 說豈後人所得而妄加之哉說者猶以班志隴西縣  
 禹貢嶓冢為疑夫夫雖善辨卒不能滅秦州嶓冢之名  
 則何如取隴東之山皆嶓冢  
 一語深思而紬繹之也哉

丹水出京兆上洛縣西北冢嶺山

一名高豬山也丹水東南流與清池水合水源東北出

清池山西南流入于丹水

東南過其縣南

縣故屬京兆晉分為郡地道記曰郡在洛上故以為名

竹書紀年晉烈公三年楚人伐我南鄙至于上洛楚水

注之楚水源出上洛縣西南楚山昔四皓隱于楚山即

此山也其水兩源合舍于四皓廟東又東逕高車嶺南

翼帶衆流北轉入丹水嶺上有四皓廟丹水自倉野又

東歷兔和山即春秋所謂左師軍于兔和右師軍于倉

野者也

又東南過商縣南又東南至于丹水縣入于洵



契始封商魯連子曰在太華之陽皇甫謐闕駟竝以為  
 上洛商縣也殷商之名起于此矣丹水自商縣東南流  
 注歷少習出武關應劭曰秦之南關也通南陽郡春秋  
 左傳哀公四年楚左司馬使謂陰地之命大夫士蔑曰  
 晉楚之盟好惡同之不然將通于少習以聽命者也京  
 相璠曰楚通上洛阨道也漢祖下浙酈攻武關文穎曰  
 武關在浙縣西一百七十里宏農界也丹水又東南流  
 入白口歷其戍下又東南浙水出浙縣西北宏農盧氏  
 縣大蒿山南流逕修陽縣故城北縣即浙之北鄉也又  
 東入浙縣流結成潭謂之龍淵清深神異者舊傳云漢

祖入關逕觀是潭其下若有府舍焉事既非恆難以詳  
 矣其水又東逕其縣故城北蓋春秋之白羽也左傳昭  
 公十八年楚使王子勝遷許于浙是也郭仲產云相承  
 言此城漢高所築非也余按史記楚襄王元年秦出武  
 關斬衆五萬取浙一十五城漢祖入關亦言下浙酈非  
 無城之言修之則可矣浙水又歷其縣東王莽更名縣  
 為古亭也一清按漢志作君亭而南流入丹水縣注于丹水故丹  
 水會洶有浙口之稱丹水又東南逕一故城南名曰三  
 戶城昔漢祖入關王陵起兵丹水以歸漢祖此城疑陵  
 所築也丹水又逕丹水縣故城西南縣有密陽鄉古商



密之地昔楚申息之師所戍也春秋之三戶矣杜預曰縣北有三戶亭竹書紀年曰壬寅孫何侵楚入三戶郭者是也水出丹魚先夏至十日夜伺之魚浮水側赤光上照如火網而取之割其血以塗足可以步行水上長居淵中丹水東南流至其縣南黃水出北芬山黃谷南逕丹水縣南注于丹水黃水北有墨山山石悉黑績彩奮發黝焉若墨故謂之墨山今河南新安縣有石墨山斯其類也丹水南有丹崖山山悉赭壁霞舉若紅雲秀天二岫更爲殊觀矣丹水又南逕南鄉縣故城東北漢建安中割南陽右壤爲南鄉郡逮晉封宣帝孫暢爲順

陽王因立爲順陽郡而南鄉爲縣舊治鄴城永嘉中丹水浸沒至永和中徙治南鄉故城城南門外舊有郡社柏樹大三十圍蕭欣爲郡伐之言有大蛇從樹腹中墜下大數圍長三丈羣小蛇數十隨入南山聲如風雨伐樹之前見夢于欣欣不以厝意及伐之更少日果死丹水又東逕南鄉縣北興寧末太守王靡之改築今城城北半據在水中左右夾澗深長及春夏水漲望若孤洲矣城前有晉順陽太守丁穆碑郡民范甯立之丹水逕流兩縣之間歷於中之北所謂商於者也故張儀說楚絕齊許以商於之地六百里謂以此矣呂氏春秋曰堯







